

HUANIYA TEHUE CANAJE MA JESOSA QUITOHUA QUIJJE OHUA ACAÑAJE'YO

Eyacuiñajjiya jjaja'aqui mee canaje quijje ohua acaje'yo

1 ¹Eya Huani, Jesosaja epeejji jaahuanajji etii. Jesosa Quito Hua
eya tehue mee canaje jiquio esohui cuana ojjaña que jama ba'a:
Eyacuiñajjiya jama acanaje ba'a: —Eyaya ecuea Ebacua Ejja Jesosa Quito
ojaya ebajji jjaja'aqui meeje'yo ma eya quijje aje. Jamajjeya Jesosaa
ojjaña ojaya epeejji jaahuanajji cuana ba mee caje ma eya quijje pishana
aje —Eyacuiñajji poanaje.

Ba majje Jesosaa esohuidojiji huoojea canaje e que. Esohuidojijiya
ecuea ebajji jjanequipanaqui mee canaje quijje Eyacuiñajjiya acaje.

²Esohuidojijiya ba mee cajo, eyaya tehue'yonaje ojjaña ma ohua quijje
acaje. Jiquio esohui ecue tehue Eyacuiñajjiya huohui cajje. Jesosa
Quito Hua ecuea ebajji jjanequipanaqui mee canaje e'e jojo nei. ³Ojjaña
joya jiquio esohui etehue'yo e'e jojo nei bajji poani queabihui nee
poaje'yo. E'e, jiquio ejjanequipanaqui meeji ba majje, jiquio esohui
jayojja jama amajje pealai queabihui nee poaje'yo. Ojjaña jiquio
etehue'yo jayojja quijje pishana apoa poaje'yo. Beshahua nei apoa.

Esohui etehue'yo Jesosaja epeejji cuana huasijke Asia meshijo ba'e yasijke

⁴⁻⁵Eyaya Huaniya esohui tehueaña Jesosaja epeejji cuana huasijke me
oejje beca cuiñajjiyo ba'e yasijke Asia meshi yasijke pealai. Ecuea esohui
etehue'yo jama ba'a: Eyacuiñajji yahuajo nei nei nequi titiia poa. Jjeya nei
yani tii tii. Quijje oya ani titiije'yo pealai. E'e, oya poeje o'oya. Edojjoshahua
Pame nequiani Eyacuiñajji e'anioque ani cojja nei. Jesosa Quito jomajo
yani pealai. ¡Ohuaya miquianaya cajaahuana cahua quea pame nee; quea
bei capo mee cahua pealai! E'e, Jesosa Quito Hua e'e jojo nei huohui canaje
Eyacuiñajjiyo. Oya mano'yo majje ebionei shequi o'oyanaje eba'e titiijyozjji.
Oya ojjaña emeshi mese cuana huoojeajji poani pealai. Jesosa ecuana quea

jea nee poanijo mano'yonaje acui ecueata'apeejo. E'e, oya mano'yajo oja ena' cuayaquinaje esejaya mimishi cuana cuijea'yoiji. ⁶Oya ojjaña huoojeajji poanijo eseya ojjaña huoojeajji po mee cani onijje. Eseya huoojea cani esohui huohuiya oja Chijja, Eyacuiñajjiya. ¡E'e, oya oe nei ojjaña huoojea'yoiji quea ca'a capo'yahua tii tii! ¡Ojjañaa oya cabihuia cahua tii tii! Jamaya capoahua.

⁷¡Bacue! Oya poeje o'oya bo biajje. Ojjañaa oya ba caje. O quecu'a'yoiji epohua pea'aiya oya ba caje. Ojjaña dejja mimishi ojjaña meshijo ba'e o ba majje quea mete nee nee poaje'yo. Pa neineije'yo jama ba'a: —¡Coya aje oe Jesosa poeyani esejaya mimishijo ese napaa! —ojjaña poaje. E'e, jamaya capoahua.

⁸—Eya yahuajo anitiitiiia poa. Jjeya eya yani tii tii; quijje eya poeje o'oya pea'ai. Eyaya ojjaña jamaya aña —Eyacuiñajjiya jamaya acani. Oya ojjaña huoojea'yoiji quea ca'a nee nee poani.

Huaniya Jesosa ba ca'ya poa ejjanequipanaqui nequi

⁹Epeeji cuana, eya miquianajaya edoe mese jayojja jama poani eseya Jesosa nijje jjapeequianijo. Jesosaa eseya huoojea canijo ese nijje anije'yo. Onijje jjapeequianijo, pea cuaa eseya quea nee po mee cani. Eseya quea nee poanijo jamatii Jesosa nijje jjapeequi pajea'yo ajja. E'e, eya iña majje pea cuaa aje iña oe eya nasi Patamoso bajjani yasijje huoojeajea canaje Eyacuiñajjiya esohui huohuijijojo pea'ai. ¹⁰Edojjoshahua Pameya eya ba mee canaje Jesosaja epoe o'oyajji. Oya jama poanaje ba'a: E daasajje nequi eyaya shajja'ajjanaje Jesosaja esohui. ¹¹Eshe'ana janobajjima nei emiajji jayojja jama Jesosaa eya huohui canaje jama ba'a: —Huani, eyaya miya quea huiso ba meeje. ¡Maya oe tehuecue! ¡Tehue mee majje esohui huoojeacute ecuea epeeji cuana huasijje me oejjje beca cuiñajjijo ba'eca huasijje, Asia meshi yasijje! Ma cuiñajji huiso cuana huasijje ba'a: Epeso cuiñajji, Esemina cuiñajji, Penamo cuiñajji, Tiatina cuiñajji, Sanisi cuiñajji, Pinanepia cuiñajji, Naonisea cuiñajji pea'ai yasijje —Jesosa poanaje.

¹²Majoya ojaya esohui shajja'ajja majje eyaya bajeanaje ae enijje mimiani ebajji. Eyaya banaje cuaquijiji me oejjje beca huisome cuaquijiji nequijjijo nequi. ¹³Cuaquijiji yiyesamaneijo nequi eyaya banaje Jesosa, ojjañaja Edoe Mese. Oya ca ca oe quea pame nee nee nequi jama ba'a: Oja daqui quea ao nee nee ojaya ejiojji yasijje yee ba'e. Mei huo'o esipi quea nahuejo ejjayica'aqui dojjojanijijje. ¹⁴Ojaya ehuojja ña quea oshe nee nee bo oshe jayojja. Ojaya ecojja quea jeajahua nee nee cuaqui jijiani jayojja. ¹⁵Ojaya ejiojji ca ca quea siyo nee nee baa cuaquijo quea quiyo nee nee po majje quiyo huo'o huo'oani jayojja jama. Ojaya emimi'yo janobajjima nei ena quea cuejipashi nee mei pasaca biajje oquequiani jama. ¹⁶Majameta me oejjje beca huisome oja me jjotojo yani, ebianeí mejje. Oja enabajje cuayanaje esohui quea ja'a nee nee baa quea shejji jayojja; baa se beca jayojja. Ojaya ebose quea jeajahua nee nee eshequi quea jiji nee nee jayojja.

¹⁷O ba majje eya quea mete jjejojo jaabichaquinaje oja ejiojji pejjejo, emano'yo jayojja mo jaanaje. Jamajjeya ohuaya eya napa'ajja canaje ebianeい emejje. Jama poanaje ba'a: —¡A'a quea mete pojji! Eya yahuajo nei nei nequi tiitiia poa. Eya nequi tiitiiani pea'ai. ¹⁸Eya mano'yo majje shequi o'yanaje. Eya eshe tii tii yani. Eya emano'yo huoojea'yojji. Eyaya oya cuana eshe o'oya po meeje'yo, yamiji po meeje'yo. Ecue esohuijo ojjaña mimishi cuana poquije'yo cuaqui yasijje. Ojjaña quea pame ca ca eyahuasijje poquije'yo.

¹⁹Huani, eyaya miya ba meeña ojjaña ma ohua jjeya nei acani, quijje nei ohua acaje pea'ai. ¡Ba majje maya tehuecue! ²⁰Eyaya miya ba meeje majameta me oeje pea beca huisome ecue me jjotojo ani, cuaquijji nequijji me oeje beca pea'ai. Maya miquea quea quehua. Jama poani ba'a: Mei huo'o cuaquijji nequijji quea nahue jayojja oya cuana, ecuea epeeiji nei cuana ba'e ma me oeje beca cuiñajijo ba'eca. Majameta cuana esohui huohuijji cuana jayojja, ecuea epeeiji jaahuanajji jayojja pea'ai —Jesosa poanaje enijje.

Jesosaja esohui Huaniya tehue canaje Jesosaja epeeiji cuana Epesojo ba'eca huasijje

2 ¹Majoya Jesosaa huohui canaje jama ba'a: —Huani, ¡ecuea esohui tehuecue esohui huohuijji Epesojo ba'e yasijje! Oya ecuea epeeiji jaahuanajji. Jama tehueme acue ba'a: “Jamaya eyaya miya huohuaña ba'a: Eya Jesosa Quito. Eyaya esohui huohuijji cuana majameta me oeje beca huisome jayojja jaahuanajja ecuea eme jjotojo. Eyaya ecuea epeeiji ma cuaquijji nequijji jayojja jaahuanajja pealai. Jamaya eyaya miya huohuaña ba'a: ²Ecuea eba ojjaña miquianajaya eba'ejji. Miquianaaya enijje ojjaña pojxajo chaco neineiaña. Quea camaja. Jamatii enijje chaco pajea'yo ajja. Miquianaya jjapeequi ajja esohui huohuijji nisho cuana nijje. Oya cuana siajje poanaje jama ba'a: —Jesosaa ecuana huoojea canaje oja sohui huohuiya.

“Jamatii miquianaaya ona shajja'ajja nei nei majje huohuinaje jama ba'a: —Chojja, miquianaya siajje poani. Esuhui huohuijji nisho jja mi coma —miquiana poanaje. ³E'e, miquianaaya enijje chaco neineiaña, chacochaco pajea'yo ajja. Enijje chacochacoanijo, pea cuaa miquianaya napa canaje quea huiso. Jamatii enijje miquianaya chacochacoanijo tii. ⁴Jamatii eya miquianajo quea yeno poani. E'e, yahuajo eya miquianajaya quea jea nee nee poanaje. Jjeya ca ca chojja, quea jea pishana. Jamaya quea mimishi. ⁵Jamajjeya ¡jjashahuabaquicue! Yahuajo eya miquianajaya quea jea nee nee poanaje. ¡Eya quea jea nee nee a o'oyacue, ma ecua miquiaaya yahuajo anaje jamaya acue! ¡Bacue oe! Miquianaya e shajja'ajja sa po ajjajo eya poecuajije miquiana que. Jiquio ecua cuaquijji quijjo'yo majje quea misi po'yani jayojja jama eyaya miquianaya ecuea esohui huohui pajea meeje'yo, ca miquianaya ma ecua yahuajo miquiaaya eya quea jea nee nee anaje jama mi a o'oyajo. ⁶Jamatii pea miquianajaya ejjashahuabaquijji quea ja'a ecuea ejjashahuabaquijji jayojja jama poani

ba'a: Dejja Niconasi bajjanija epeeji cuana quea mimishi. Miquianajaya ojaya esohui boti'ama. Maya ecuea boti'ama pealai.

⁷"Jamajjeya ıshajja'ajjacue Edojoshahua Pameja esohui ojjaña ecuea epeeji cuana Asia meshijo ba'eca huasijje! ¿A'a miquianaya e shajja'ajjaji? ¿A'a shajja'ajja sa poani? Ojjaña joya enijje jjapee tiitiiquiani eshahua jeabichajeajji poani. Jamajoya eyaya oya cuana nequi tiitii meeje'yо Eyacuiñajji nijje eyajo. Eyaya oya cuana acuijjajja ijja meeje Eba'e tiitii mee'yoji, ma Eyacuiñajji acui yiyejo nequi".

—Jamaya eyaya, Jesosaa huoojeaña ecuea esohui etehue'yо ecuea epeeji cuana Epesojo ba'eca huasijje. ¡Jamaya tehuecue, Huani!
—Jesosaa eya acanaje.

Jesosaja esohui ojaya epeeji cuana Esemina cuiñajjijo ba'eca huasijje

⁸Majoya Jesosaa huohui ca o'oyanaje jama ba'a: —Huani, ¡ecuea esohui tehuecue esohui huohuijji Eseminajo ba'e yasijje! Oya ecuea epeeji nei jaahuanajji. Ejo jama tehuecue ba'a: "Eya Jesosa Quito. Jamaya eyaya miya huohuaña: Eya yahuajo nei nei nequi tiitiia poa. Eya nequi tiitiiani pealai. Mano'yо majje eya shequi o'oyanaje. ⁹Ecuea eba miquianaya enijje jjapeequianijo pea cuaa napa canaje. Jamajjeya miquianaya aema!. Jamatii ecuea epeeji poanijo miquiana quea aquiana huiso jayojja. Quea bei nee nee poani. Ecuea eba pea'ai beca cuaa miquianaya niñeba cani. Oya cuana siajje poani jama ba'a: —Ecuanaya Jodio cuana —poani.

"Chojja, Jodio cuana pojjeama oya, Eyacuiñajji epeeji pojjeama. Edosiquianaja epeeji cuana poani. ¹⁰¡Bacue! Quijje pishana miquianaya napa caje cuaa. Edosiquianaja epeeji cuaa miquianaya iña majje jeanobia caje enijje ejjapeequi pajea'yoji nisho. Oe pojji cahuime miquianaya quea nee po mee caje, 10 cahuime. Jamatii ja'a quea mete pojji! ¡A'a enijje jjapeequi pajea'yoji jamatii cuia cajje! E pajea'yо ajja tii tii eyaya miquianaya ba'e tiitii meeje'yо eyajo Eyacuiñajji nijje. ¹¹Jamajjeya ıshajja'ajjacue Edojoshahua Pameja esohui ojjaña ecuea epeeji cuana Asia meshijo ba'eca cuana huasijje! Ojjaña joya enijje jjapee tiitiiquiani cuaqui yasijje epoqui'yoji pojjeama".

—Jamaya eyaya, Jesosaa huoojeaña ecuea esohui etehue'yо ecuea epeeji cuana Eseminajo ba'eca huasijje. ¡Jamaya tehuecue, Huani!
—Jesosaa eya acanaje.

Jesosaja esohui ojaya epeeji cuana Penamo cuiñajjijo ba'eca huasijje

¹²Majoya Jesosaa eya huohui ca o'oyanaje jama ba'a: —Huani, ¡ecuea esohui tehuecue ecuea esohui huohuijji Penamo cuiñajjijo ba'e yasijje! E'e, esohui tehuecue jama ba'a: "Eya Jesosa Quito. Eyaya esohui huoojeaje mi que. Baa ose miji pealai isho jama quea shejji nee nee, quea ca'a nee nee jayojja ecuea esohui. ¹³Ecuea epeeji cuana, miquianaya ba'yani cuiñajji quea mimishijo. Beshahua nei ojjaña jomajo ba'e Edosiquiana nei nijje jjapeequianijo. Jamatii

miquianaaya ecuea esohui jayojja jama atiitiiña. Ecuea epeejji Anatipa bajjani miquiana nijje ba'e'yonaje. Ohuaya ecuea esohui huohui majamaja canaje quea pame nee. Jamajoya oya pea cuaa quecua ca'yonaje. Jamatii miquianaya enije jjapeequi pajea'yo ajja.¹⁴ Jamatii eya miquianajo quea yeno. Quea mimishi poani miquianaya; Banaamija esohui jama aje oe poani beca cuana Penamojo ba'eca. Ohuaya, Banaamiya emeshi mese Banaca bajjani yahuajo nei nei ba mee ca poa Isaeni cuana quea mimishi, quea tai epo mee'yojji. Miquianaya beca cuaa Isaeni cuana quea mimishi ba'ya poa jayojja jama poani. E'e, jjeya bobi, noe cuanaya eyacuiñajji nisho bihuiajji dahua majje dejja mimishi cuana nijje ojee ijja'iijjani pea'ai. Pea epona cuana nijje quea mimishi poani pea'ai.¹⁵ Cuanaya miquiana nijje jjapeequiani beca cuana quea mimishi. Dejja Niconasi bajjanija esohui quea tai pajea sa po'yo ajja. Quea mimishi nee nee. ¹⁶ Jamajjeya ¡miquianajaya mimishi cuana pajea'yocue! Pajea sa po'yo ajjajo eya poecuajije miquiana que. Poe majje eyaya ecuea epeejji quea mimishi poani tecuea neineije'yo. Baa ose miji pea'ai isho jama quea shejji nee nee quea ca'a nee nee jayojja ecuea esohui poaje. Quea yeno nee nee po meeje'yo.

¹⁷ “Jamajjeya ¡shajja'aJJacue Edojjoshahua Pameja esohui ojjaña ecuea epeejji cuana Asia meshijo ba'eca huasijje! Ojjaña joya enije jjapee tiitiiquiani Edosiquiana jeabichajeajji poani. Jamajoya eyaya oya cuana ba'e meesahuaje'yo tii tii. E'e, yahuajo Eyacuiñajjiya ojjaña Moisesi nijje nequi pahui sisi eyajje oque ijja mee ca poa. Jamaya eyaya aje o'oya miquianajaya. Maya ecuea epeejji pojjeamaja ba jjima. Ecuea epeejji cuana huasijje eyaya quiaje mei oshe sisi pea'ai. Mei oshe biajje bajjani eyacua etehue'yo yani, maya onajaya ba jjima. Emei oshe meseja eba ojaye nei”.

—Jamaya eyaya, Jesosaa huoojeaña ecuea esohui etehue'yo ecuea epeejji cuana Penamojo ba'eca huasijje. ¡Jamaya tehuecue, Huani! —eya Jesosaa acanaje.

Esohui Jesosaja epeejji cuana huasijje Tiatina cuiñajjijo ba'eca huasijje

¹⁸ Majoya Jesosaa pea esohui huohui canaje jama ba'a: —Huani, ¡ecuea esohui jiquio eya huohuaña tehuecue esohui huohuijji Tiatina cuiñajjijo ba'e yasijje! Jamaya tehuecue ejo ba'a: “Eyaya, Jesosaa, Eyacuiñajjiya Bacua Ejja miquiana que tehueaña. Ecuea ecojja cuaqui jijjani jayojja quea ja'a nee nee. Ecuea ejiojji cuana baa huo'o cuaqui quea quiyo nee neejo nequi jayojja quea jiji nee nee poani.¹⁹ Ecuea epeejji, ojjaña joya miquiaaya aña cuana ecuea eba. Miquianaaya eya quea jea nee nee aña. Enije jjapeequi pajea'yo ajja nei nei pea'ai. Quea camajajo jamatii enije chaco pajea'yo ajja. Jamaya miquianaaya quea pame nee nee aña jjeya, yahuajo jama pojjeama; yahuajo quea pame pishana poa.²⁰ Jamatii eya quea yeno miquianajo, de. E'e, miquianaya quea mimishi poani. Epona quea mimishi Jesameni bajjani shajja'ajja cani beca cuaa. Oya aje oe siajjepoji jama poani ba'a: —Eya ca iña Eyacuiñajjiya huoojea'yo oja sohui huohuiya —oya poani.

“Chojja, siajje poani oya. Ohuaya aje oe ecuea epeejji cuana dasia cani. Quea mimishi po mee cani. E'e, ojaya esohui quea mimishijo beca cuana bobi, noe cuanaya eyacuiñajji nisho bihuajji dahua majje ojee ijja mee cani mimishi cuana nijje. Pea epona cuana nijje quea mimishi poani ojaya esohui quea mimishijo. ²¹Ecuea maya epona napa jjima; ohuaya pojja'a mimishi pajea caje'yo. Jamatii oya quea mimishi ca'a; pajea sa po'yo ajja. ²²Jamatjeya eyaya oya quea nee po meeje'yo, ojjaña cuana joya o jayojjaya quea mimishi poani pea'ai quea nee po meeje'yo, ca mimishi cuana pajea sa po'yo ajjajo. ²³Ojjaña joya o shajja'ajjajji poani eyaya mano meeje'yo. Chama'yo tii poajje'yo. Jamajoya ma ba majjeya ojjaña ecuea epeejji cuana jjabahuejjaquije e'e jojo nei ecuea eba ojjaña cuanaja ejjashahuubaquijji. Quehuajje ejjashahuubaquijji meeji pojjeama. E'e, ojjaña eba'ejji ba majje eyaya sosequiaje'yo. Quea mimishi poanijo quea nee po meeje'yo. Quea pame poanijo ca ca quea bihui nee nee po meeje'yo.

²⁴“Jamatii miquianaya Tiatinajo ba'e quea huiso nee ma esohui quea mimishi jayojja jama po ajja. Edosiquianaja esohui quea quehua, quea mimishi cuana jayojja jama po ajja pea'ai. Ba sa po ajja pea'ai. Jamatjeya eyaya miquianaya jamaya huohuiaña: ¡A'a ecuea esohui pajea'yojji! Mahuiso. ²⁵Miquianaya ecuea epeejji cuana poani. ¡Ishoacue ecuea epoe o'oyajji! ¡A'a enijke jjapeequi pajea'yojji! ²⁶⁻²⁷Ecue Chiiya eya ojjaña meshijo ojjaña huoojea'yojji po mee tiitii cani. Jamaya eyaya miquianaya ameeje'yo enijke jjapee tiitiiquianijo. E'e, miquianaaya eshahua jeabichajeaña. Ecuea esohui jayojja jama atiitiañajo, peaa miquianaya cuijajea caje'yo pojja'a. Jamatii eyaya miquianaya enijke ona huoojea'yojji nequi meeje'yo tii tii. Ojjaña huoojea'yojji quea ca'a nee nee poaje'yo, ojjaña cuana ojjaña meshijo ba'eca cuana huoojea'yojji nei nei quijje poaje'yo. Jiquio ecua meshimisi jajaajajea cani baaa jamaya shajjama' cuana ojjaña meshijo ba'eca jeabichajea'e'yo miquianaaya enijke ojjaña huoojea'yojji nequi'yo majje. ²⁸Eyaya miquianaya quiaje'yo pea'ai aquiana quea pame nee yohua jayojja ba'a: majameta ai, eshequi huiyejjji mecajjeahua nei jaasohuani jayojja jama.

²⁹“Jamatjeya ¡shajja'ajjacie Edojjosahua Pameja esohui ojjaña ecuea epeejji cuana Asia meshijo ba'eca huasijje; jjashahuubaquicue!”

—Jamaya eyaya, Jesosaa huoojeaña ecuea esohui etehue'yo ecuea epeejji cuana Tiatinajo ba'eca huasijje. ¡Jamaya tehuecue, Huani! —eya Jesosaa acanaje.

Jesosaja esohui ojaya epeejji cuana huasijje Sanisi cuiñajjijo ba'eca huasijje

3 ¹Majoya Jesosaa eya huohui canaje jama ba'a: —Huani, ¡ecuea esohui tehuecue esohui huohuijji Sanisi cuiñajjijo ba'e yasijje, ma ecuea epeejji nei cuana jaahuanajji yasijje! Tehuecue jama ba'a: “Eya Jesosa Quito.

Eyaya Edojjoshahua Pame miquiana huasijke huoojeaña. Eyaya miquianaya huohuiaña: Ecuea epeejji cuana, ojjaña miquianajaya eba'ejji cuana eyaya baña. Pea cuaa miquianajo huohui canaje jama ba'a: —Jesosaja epeejji cuana Sanisijo ba'ecaa Jesosaja esohui jayojja jama acani —poanaje.

“Jamatii eyaya miquianaya baña beshahua nei ecuea esohui jayojja jama ba'e ajja. ²Jamajjeya jecuea esohuijo jjashahuabaquicue quea ja'a nee! Quea mimishi poanijo miquianaya jjashahuabaquiani oe pojji. Beshahua nei jjashahuabaqui ja'a pajea'yonaje. Jamaya quea mimishi, de. Eyacuiñajjija esohui jayojja jama a'ajja miquianaaya. ³Ecuea esohui huohujjiya ecuea esohui huohui canaje miquiana huasijke. Jamajjeya jecuea esohui jama acue! ¡Mimishi cuana pajea'yocue! Ejo jjashahuabaqui ajjajo aje oe eya miquiana que quehuajje poecuajije quea nee nee po meeya, siipojji quehuajje poeyani jayojja. Eya ache pojjajo miquiana que poeje o'oya miquianajaya ebajji pojjeama.

⁴“Jamatii beca cuana Sanisijo ba'e quea boejea'y o ba'e, mimishi'ama nei. Oya cuana enijje ba'e meeje'yo. Quea pame nee ba'e eyaya oya cuana daqui quea oshe nee nee huosho meeje'yo enijje eba'e tiitii'yojji. ⁵E'e, ojjaña joya enijje jjapeequi pajea'y o ajja daqui quea oshe nee nee huosho meeje'yo. Ojaya ebajjani cuana eyaya tehue'yonaje eba'e tiitii mee'yojji. Maya ojaya ebajjani eyaya ecuijea'yojji pojjeama. Oya cuanajo ca ca eyaya ecue Chii huohuaje jama ba'a: —E'e, oya cuana ecuea epeejji nei —jamaya eya poaje ojjaña esohuidojoji cojja neijo ani.

⁶“Jamajjeya jshajja'ajjacue Edojjoshahua Pameja esohui ojjaña ecuea epeejji cuana Asia meshijo ba'eca huasijke; jjashahuabaquicue!”

—Jamaya eyaya, Jesosaa huoojeaña ecuea esohui etehue'yo ecuea epeejji cuana Sanisijo ba'eca huasijke. ¡Jamaya tehuecue, Huani! —eya Jesosaa acanaje.

Jesosaja esohui ojaya epeejji cuana huasijke, Pinanepia cuiñajjijo ba'eca huasijke

⁷Majoya Jesosaa eya huohui canaje: —Huani, jecuea esohui ecuea esohui huohujji, ecuea epeejji jaahuanajji Pinanepia cuiñajjijo ba'e yasijke tehuecue pea'ai! Jama tehueme acue ba'a: “Ecuea epeejji cuana, eyaya, Jesosa Quitohua quea ja'a nee nee aña, mimishi'ama, e'e jojo nei Eyacuiñajji. Yahuajo nei etiiquiana Dabi Jodio cuanaja emeshi mese poanaje. Jjeya eya Eyacuiñajjija cuiñajji eyacua mese. Eyaya esecue ca'a majje pea edobiqui meeiji pojjeama. Ca'apejo majje pea dobiqui meeje.

⁸“Ecuea epeejji cuana, miquianajaya eba'ejji ecuea eba. Miquianaya oe pojji yani. Matatii ecuea esohui jayojja jama aña. Enijje jjapeequi pajea'y o jjima. Jamajjeya eyaya miquianaya esohui huohui meeje pea cuana huasijke. Eshahuaja epeejji cuaa miquianaya ehuohui pajea mee'yojji pojjeama. ⁹Oya cuana siajje poani jama ba'a: —Ecuanaya Jodio, e'e jojo nei Eyacuiñajjija epeejji —oya cuana poani.

“Jamajjeya eyaya eshahuaja epeejji cuana miquiana que poe meeje ecui'oshajjajo nequiya miquiana bihuiaa jama ba'a: —E'e, miquianaya Eyacuiñajjija epeejji e'e jojo nei, ojaya quea jea nee nee.

¹⁰“Pea cuua miquianaya napa cani. Jamatii miquianaya ecuea esohui jayojja jama enijje jjapee tiitiiquije'yo. Jamajjeya quijje eyaya bajeache cuana ecuea epeejji e'e jojo nei. Quijje eshahuaja epeejji ojjaña cuana quea nee nee po meeje'yo; eyaya miquianaya jaahuana neineije'yo. ¹¹Quijje pishana eya, Jesosa poeje o'oya miquiana que. Jamajjeya jecuea esohui jayojja jama po tiitiicue! Jamajjeya pea cuanaja miquianaya edasajji pojjeama. Majoya Eyacuiñajjija ejjashahuubaqu'yojjii miquianajo jama acaje ba'a: Miquianaya ba'e tiitii mee caje'yo onijje. ¹²¡Bacue! Ojjaña miquianaya enijje jjapeequi pajea'yo ajjajo eyaya eyajo nequi tiitii meeje'yo. Acui ca'a, equi yamajjana quea quemo, quea ca'a nequije'yo tii tii jayojja jama ecuea epeejji nei nequi titiije'yo eyajo. Eyaya ojjaña cuana ba meeje miquianaya ecuea epeejji e'e jojo nei, Eyacuiñajjija pea'ai. Jiquio ecua e'acui meseya acuijo oja bajjani quecuatehue cani jayojja jama eyaya aje'yo; ecuea epeejji nei cuana tehueje. Jamajjeya miquianaya, ojjaña ecuea epeejji pea'ai ojee enijje eyajo ani meeje'yo. Enijje poeje'yo; Eyacuiñajjija cuiñajji eyacua, Jenosanena eyacua bajjani jayojja jama poeje. Ecuea bajjani eyacua poaje eya quea ca'a nequianijo. Maya eyaya ojjaña miquianaya ba meeje'yo.

¹³“Jamajjeya ¡shajja'ajjacue Edojjoshahua Pameja esohui ojjaña ecuea epeejji cuana Asia meshijo ba'eca huasijke; jjashahuabaquicue!”

—Jamaya eyaya, Jesosaa huohuaña ecuea epeejji cuana Pinanepiajo ba'eca huasijke. ¡Jamaya tehuecue, Huani! —Jesosaa eya acanaje.

Jesosaja esohui ojaya epeejji cuana huasijke Naonisea cuiñajjijo ba'eca huasijke

¹⁴Majoya Jesosaa eya huohui ca o'oyanaje pea'ai jama ba'a: —Huani, jecuea esohui huohuijji Naonisea cuiñajjijo ba'e yasijke tehuecue ecuea esohui! Oya ecuea epeejji nei jaahuanajji. Jama oya tehuecue ba'a: “Ecuea epeejji cuana, eya Jesosa e'e jojo nei Eyacuiñajjija huoojea'yo. Eyaya huohuaña Eyacuiñajjija esohui e'e nei. Eyaya Eyacuiñajji nijjeya ojjaña pana cooa poa. Eyaya miquianaya huohuaña jama ba'a: ¹⁵⁻¹⁶Ojjaña miquianajaya ebalejji cuana ecuea eba. Eyaya baña miquianaya enijje jjapee neineiqui sa po ajja. Jamatii e cajaa sa po'yo ajja pea'ai. ¡A'a epeejji nisho pojji! ¡E cajaa a sa amajje jja ca iña oe huohuicue! E'ishijji quea quiyo pojjeama jayojja poani miquianaya. E'ishijji quea huoe pishana enabajo peajja, ena quea tai jama. Jiquio ecua seja chijjoco ena ishi'ajja majje ojjajea'yaña jayojja jama eyaya miquianaya cajaa achana', ca ecuea esohui miquianaaya mi shajja'ajjajo. ¹⁷Miquianaya aje oe jiquio jama jjashahuuba quehuaquiani ba'a: —Eya ca iña Eyacuiñajjija epeejji quea pame nee poani —miquianaya jamaya poani. Jamaya pea'ai poani ba'a: —Eya dejja quea aquiana huiso jayojja jama poani.

"Chojja. Miquianajaya eba pojjeama Eyacuiñajjiya miquianaya ba cani jama ba'a: Miquianaya aema' jayojja, daquima' jayojja, cojjama' jayojjaya. Miquianaya quea mimishi ba'yanijo Eyacuiñajji quea yeno nee nee poani miquianajo. ¹⁸ Jamajjeya eyaya miquianaya huohuiaña: ¡Eya sa neineicue! ¡Ecuea esohui shajja'ajja neineicue! Ecuea esohui mei huo'o quea nahue jayojja jama poanijo, miquianajaya eba'ejji quea ja'a nee poaje. Eya miquianajo mano'yonaje miquianajaya mimishi cuijea'yojji. ¡Jamaya jjashahuubaquicue! Maya ba majje miquianaya daqui oshe ehuoshoyo ba'e jayojja jama poaje, quea boejea nee. Jamajoya miquianaya bicho'ama poaje miquianajaya mimishijo. ¡Edojjoshahua Pame bacue! Oya ecojja shicuijji jayojja; ohuaya miquianaya ecuea esohui ba meesahua caje'yo, quea jjashahuubaquijja ja'a nee po mee caje'yo. ¹⁹ Ojjaña ecuea epeejji eyaya tanacuaña, tecueña pealai ejjabahuejjaqui meeiji ecuea quea jea nee neejo. Jamajjeya ca oe ¡ecuea esohui jayojja jama acue e'e jojo nei! ¡Ecuea epeejji nisho a'a po majajji! ²⁰ ¡Bacue! Esecuejo nequiya iyaa cani edobiquijji, miquiana nijje ejjapeequijji. Oya jayojjaya eya poani. Eyaya miquianaya iyaaña. E shajja'ajja majje jama pocue ba'a: —¡Jesosa, dobicue! —jamaya poajo eya miquiana que dobiquije miquiana jjashahuubaquijja meeiji. Miquianaya enijje jjapeequije pealai. Jiquio ecua epeejji cuana ojee ijjal'ijjiani jama poaje eseya. ²¹ E'e, ojjaña joya enijje jjapee tiitiquiani eshahua jeabichajeajji poani. Jamajjeya quijje eyajo eyaya huohuaje jama ba'a: —¡Enijje nequicue! ¡Enijje ojjaña huoojea'yojji pocue!

"E'e, miquianaya e jayojja jama poaje. Eyaya quea ca'aa jjejojo Edosiquiana jeabichajeanaje. Jamajjeya ecue Chii nijje eya anioqueani; ojjaña huoojeajji poani tii tii. ²² Jamajjeya ¡shajja'ajjacue Edojjoshahua Pameja esohui; ojjaña ecuea epeejji cuana Asia meshijo ba'eca cuana jjashahuubaquicue!"

—Jamaya eyaya, Jesosaa huoojeaña ecuea esohui etehue'yo ecuea epeejji cuana huasijje Naonisea cuiñajjijo ba'e yasijje. ¡Jamaya tehuecue, Huani! —eya Jesosaa acanaje.

Ojjaña eyajo ba'ecaa Jesosa bihuia cani

4 ¹Majoya esohuidojobjiya jjanequipana meequi canaje jama ba'a: Eya ba mee canaje esecue eca'apejo nequi jayojja eyajo. Jjanequipana cooqui mee canajejo Jesosa enijje miminaje. Ojaya esohui eshe'ana emiajji jayojja jama janobajjima nei huohui canaje yahuajo pishana. Jjeya ohuaya eya huohui ca o'yanaje jama ba'a: —Huani, ¡poecue eyahuasijje e que! Eyaya miya ba meeje jiquio eya quijje aje —Jesosa poanaje.

²Jjeyahua nei Edojjoshahua Pameya eya ba mee canaje jama ba'a: Emeshi Mese nei e'anioque ani ojjaña huoojea'yojji. ³ ¡Oya ache bame nee nee poanaje! Quea jeajahua nee nee mei ca'a quea siyo jayojja: mei quea nahue jasepe bajjani jayojja, codinania mei bajjani jayojja pealai. Ojaya e'anioquejjijo eshijje copocopo jayojja yaninaje quea bame nee nee mei tahuua esemenana mei bajjaniya jeasiyo cani jayojja jama. ⁴Quea huiso Jesosaja epeejji etii

cuana, 24 huisome onijje e'anioque ani. Eyacuiñajji ca ca eyiyesama neijo ani. Onajaya daqui quea oshe nee nee. Esapajo iya mei huo'o ejaahuojja quea nahue ani emeshi mese epojji. ⁵Eyacuiñajjiya ojaya e'anioquejjijo aniya pojjeje po mee cani, beni jjaqueyaqui mee cani, cueji taaa po mee cani pe'a'i. O cojja neijo cuaquijiji me oeje beca huisome nequi. Jiquio cuaquijiji cuana jama ba'a: Edojoshahua Pameya acani Jesosaja epeejji cuana nijje ma ecua me oeje beca cuiñajjiyo ba'e jama. ⁶Eyacuiñajji cojja nei eyaya banaje bae quea tahuá nee nee jayojja, quea coe nee nee, quea siyo nee nee jayojja.

Eyaya banaje pea'ai ebeca pee pea'ai aquiana eshe, quea cojja huiso nee nee Eyacuiñajji e'anioque ani pejjejo, cojja beca jayojja, ecojja quipa huejjajje jjabaquiani pea'ai. ⁷Oe aquiana eshe ibia jayojja. Pea ana'ai jayojja. Pea aquiana dejja jayojja cojjame, dejja cuichojji jayojja. Pea huipta cuabesaba'e jayojja jama. ⁸Ojjaña jiquio aquiana eshe cuichojji cuabesajji de, ojjaña 6 cuichome, me oeje oe cuichome. Ojjaña cuana quea cojja huiso nee nee; ojaya ecuicho quimejjeje pea'ai ecojja cuana yani. Ojjaña cuana sohuicuayani tii tii Eyacuiñajji bihuajji; sohuicuaya pajea aija nei nei mecajje ai quiana. Jamaya poani ba'a:

“Eyacuiñajji, miya ca ca oe quea pame, mimishi'ama, quea boejea nee nee. Miya ojjañaja Emeshi Mese nei quea ca'a nee nee. Miya yahuajo nei nei ani tiitiia poa, jjeya ani tiitiiani, quijke ani tiitije'yo pea'ai”. Jamaya oya cuana poani.

⁹E'e, ma aquiana eshe cuana sohuicuayani Eyacuiñajji bihuajji. Jama poani ba'a: “Eyacuiñajji, miya oe nei quea pame nee nee, oe nei nequi tiitiiani, ojjañaa miya cabihuia cahua!” oya cuana jama sohuicuayameya poani.

¹⁰Ma shajja'ajja majjeya Jesosaja epeejji etii cuaa, ma 24 huisomeya ecui'oshajjajo nequiya Eyacuiñajji bihuia cani. E'e, oya oe nei e'anioque ani tii tii bihuia cani. Onajaya mei huo'o ejaahuojja quea nahue nee cajjajea majje Eyacuiñajjiya ejiojji pejjejo iyaoquea cani. E'e, Eyacuiñajji oe nei quea ca'a nee nee. Jamajjeya oya bihuia cani cuaa jama ba'a:

¹¹“Eyacuiñajji, miya oe nei ecuanaja Emeshi Mese nei. Miya oe nei quea pame nee nee. Jamajjeya ecuaaya miya bihuiaña. Miya oe nei ani tiitije'yo, oe nei ojjaña huoojeajji. Miyaya ojjaña aquiana cuana pana cooa poa. E'e, ojjaña aquiana miyaya saña. Jamajjeya pana majje nequi tiiti meeña, miyaya”.

Jamaya Eyacuiñajji bihuia cani ma 24 epeejji etii cuaa eyajo aniya.

Ejeejo esohui etehue'yo eyaya banaje

5 ¹Majoya eyaya, Huaniya Eyacuiñajji e'anioquejjijo ani banaje. Ojaya eme' ebianeijje esohui ejeejo tehue e'iñabebo nequi eyaya banaje. Jiquio ejeejo quea huiso esohui etehue poanaje, omiji pea'ai tehueme'ya poanaje. Tehuejeyo majje me oeje beca, ⁷ ijjiabaji meeme'ya poanaje. ²Eyaya esohuidojiji quea ca'a nee nee banaje pea'ai. Ohuaya ojjaña

cuana janobajjima nei huohui'ajja canaje jama ba'a: —¡A'ya cuae quea pame nee nee esohui etehue'yo hui isajji esohui etehue'yo ebajji? ¡Joya quea pame nee Eyacuiñajji cojja nei nei nequicue esohui etehue'yo ecueabaji hui isajji! —esohuidojojji jama taaameya poanaje.

³Jamatii eyajo ba'e, meshijo ba'e pea'ai, yahuajo emano'yo pea'ai chama' poanaje oe quea pame nee nee esohui cuiabaji hui isajji, ejee jjequijeapiihuijji. Chojja, chama' nei nei poanaje oe quea pame nee nee ma esohui ba meeiji. ⁴Jamajjeya chama' nei ba majje eya quea yeno poanaje. Pa neineinaje. ⁵Majoya Jesosaja epeeiji etii, ma Eyacuiñajji bihuia caniya pea 24 huisome cuana nijjeya eya huohui canaje: —¡A'a oe pajji! ¡Bacue! Oe dejja Jesosa bajjani yani, ma Jodaja osecua, emeshi mese Dabija osecua poa. Oya ca ca oeya esohui cueabajiji hui isa majje ejee jjequijeapiihui caje'yo esohui ebajji. Oya quea ca'a nee nee, ibia naa asha jayojja jama ojjaña huoojea'yoji poani.

⁶Majoya eyaya banaje oe dejja Eyacuiñajji e'anioque ani pejjejo nequi. Oya ebeca pee pea'ai huisome aquiana eshe cuana yiyesama neijo nequi, Jesosaja epeeiji etii quea ca'a quea huisome cuana yiyesama neijo nequi pea'ai. Oya ca ca jiquio jama ba'a, ñajjajja esho'i equecua'yo jayojja ojjaña mimishi cuijea'yoji. Oya Emeshi Mese nei quea ca'ajo ñajjajja yahue she'anajji jayojja me oeje beca she'aname jayojja eyaya oya banaje. Ojjaña ojaya eba neineijo oya quea cojja huisome nee jayojja banaje eyaya, me oeje beca cojjame jayojja eyaya oya banaje, 7 cojjame. Ecojja cuana Edojjoshahua Pameya acani, ma Edojjoshahua Pameya Jesosaja epeeiji cuana ojjaña meshijo ba'leja yajjijo acani jayojja. ⁷Ma dejja ñajjajja equecua'yo jayojja Eyacuiñajji que jjanequichipiqui majje jjeshe canaje esohui etehue'yo oja ebianeい mejje iñanequia nequi. ⁸Jamajjeya aquiana eshe cuaa ebeca pee pea'ai huisomeya Jesosa bihuia canaje. Jesosaja epeeiji etii quea huisome pea'ayiya Jesosa, ma ñajjajja equecua'yo jayojja bihuia canaje ecui'oshajjajo nequiya. Oya cuanaja e'iñaqueyajji yaninaje. Mei huo'o caneco madeja pohui jayojja anijji yaninaje pea'ai. Madeja pohui jayojja huichachanaje. Huichacha quea shiye Eyacuiñajji epeeiji emimi onijje jayojja. ⁹Jesosaja epeeiji etii cuana esohui eyacua sohuicuayanaje Jesosa bihuiajji jama ba'a:

“Jesosa Quito, ¡miya quea pame nee neejo esohui etehue'yo jjeshe majje ecueabaji hui isacue! E'e, miya quecua canaje cuaa. Miquea ena' cuayaquiajo mano'yonaje ojjaña cuanaja mimishi cuijea'yoji. Ojjaña miquea ejjeshe'yo jayojja. Jamajjeya Eyacuiñajji nijje jjapeequi meeaña ojjaña cuana ojjaña meshijo ba'e, ojjaña cuiñajjijo ba'e, ojjaña pea esohuijo mimiani cuana pea'ai. ¹⁰Jesosa, miya ojjaña huoojea'yoji poani. Jamajjeya ecuana huoojeaje minijje ojjaña joya ojjaña meshijo ba'e huoojeaa, esejaya Chii aija esohui huohuiya pea'ai”.

Jama sohuicuayameya poanaje Jesosa bihuiajji.

¹¹Majoya eyajo eyaya banaje esohuidojojji quea huisome nee nee. Eyaya onajaya esohuicuayajji shajja'ajjanaje pea'ai. Oya cuana quea huisome nee

neejo sicosico ajja. ¡Ache huiso nei nei, de! Oya cuana ejjanequitoqui'yo nequinaje aquiana eshe cuana, Jesosaja epeejji etii cuana quea huiso pe'a'i ejjanequitoqui nequi'yonaje. Ojjaña yiyesama neijo Eyacuiñajji e'anioque ani. ¹²Onaya janobajjima nei sohuicuayanaje; Jesosa bihuia canaje jama ba'a:

“Jesosa, miya quea pame nee nee. Miya ojjaña mimishijo mano'yonaje, ñajjajja sho'i equecua'yo jayojja jama poanaje. Miya oe nei ojjaña huoojeajji. Ojjaña aquiana miquea, ojjaña tii. Ojjaña miquea eba. Miyaya quea ca'a poaniya jjejojo ojjaña aña. Ecuanaaya miya shajja'ajjaña; ecuanaaya miya bihuiaña. Ecuanaaya huohuiaña mijo jama ba'a: —Jamaya quea pame nee miyaya aña —poani”.

Jamaya esohuidojiji cuana poanaje eyajo.

¹³Majoya eyaya shajja'ajjanaje ojjaña Eyacuiñajji pana cuana, ojjaña eyajo ba'eca cuana, ojjaña meshijo ba'eca cuana, ojjaña yahuajo mano'yo cuana, ojjaña enajo ba'eca cuana pea'aiya sohuicuayani. Ojjaña cuanaa Eyacuiñajji e'anioquejjijo ani bihuia cani. Jesosa ma ñajjajja jayojja jama mano'yonaje pea'ai bihuia cani onaaya jama ba'a:

“Eyacuiñajji, miya ojjaña huoojeajji. Jesosa, miya ecuanajo mano'yonaje. Jamaya quea pame nee nee. Jamajjeya ojjaña ecuanaaya miya bihuiaña. Miya shajja'ajjaña pea'ai ecuanaaya. Quea ca'a nee neeya jjejojo miyaya ojjaña cuana aña. ¡Jamaya capoahua tii tii!”

Jamaya sohuicuayani ojjaña cuana.

¹⁴Majoya aquiana eshe cuana Eyacuiñajji pejjejo ani jama poanaje ba'a: —E'e, ijamaya ojjañaa miya cabihuia cahua tii tii!

Jesosaja epeejji etii cuaa, ma 24 huisomeya pea'ai Eyacuiñajji bihuia canaje ecui'oshajjajo nequiya. Oya ca ca oe enequi tii tii. E'e, Jesosa etehue'yo ecueabajiji me oeje beca ecueabajime'ya hui isajea mee caje, Eyacuiñajjiya.

Eshui etehue'yo oe ecueabajiji'ya isajea canaje Jesosaa

6 ¹Majoya eyaya, Huaniya banaje jama ba'a: Jesosa, ma ñajjajja sho'i equecua'yo jayojja yani. Ohuaya oe etehue'yo ecueabajiji'ya isajea canaje, ebionei. Majoya eyaya shajja'ajjanaje oe aquiana eshe eyajo mimiani. Ojaya esohui cueji taaaani jayojja. Joya mapichi aija edaasa biajje ani yasijje taaaanje jama ba'a: —¡Poecue!

²Jjeya nei eyaya banaje mapichi oshe poeyani. Ohuaya mapichija edaasa biajje aniya mai ecohuijji iña canaje. Oya emeshi meseja ejaaahuojja quea nahue nee quia canaje cuaa. Oya poquicuajinaje ojjaña jeabichajjeaa, emeshi mese quea ca'a nee nee jayojjaya.

³Majoya Jesosaa pea ecueabajiji'ya isa canaje. Eyaya pea aquiana eshe eyajo shajja'ajjanaje. Ohuaya jama iyaame acanaje ba'a: —¡Poecue!

⁴Jjeya nei eyaya banaje mapichi ai quea huo'o nei nei. Dejja mapichija edaasa biajje ani baa ai quia canaje cuaa. Oya jama huohuime acanaje cuaa ba'a:

—¡Poquicue miya! ¡Ojjaña jjaquecuaqui meecue pea cuana nijjeya! —jamaya poanijo ojjaña quea tecue nee po mee cani ojjaña pea cuana nijje.

⁵ Majoya Jesosaa pea ecueabajiji'ya isajea ca o'oyanaje. Pea aquiana esheya iyaa canaje jama ba'a: —¡Poecue!

Majoya mapichi ai tehue poeyani eyaya banaje. Ohuaya mapichija edaasa biajje aniya e'ipia'ajjjiji iña canaje, bobi ipia'ajjjiji, oe pojji bobi yani jojoya.

⁶ Majoya eyaya shajja'ajjanaje pea eyajo mimiani aquiana eshe yiyesamajje nequi. Jama poanaje joya mapichija edaasa biajje ani nijje ba'a: —¡Echacojji cuana oe pojjojo chacochaco majje oe pojji bobi quiacue chaco sosejje! ¡Anoso oe pojji, oe tepe iye quemo pojja'a quiacue; shijje iye huiso pea beca peejjima tepe pojja'a quiacue jjeyahua nei e'lijjiji! ¡A'a huana meeiji quiije e'lijjiji'yojji! ¡Acuijjajja sei, acuijjajja na e'ishiji a'a quea nahue ameeiji! —oya poanaje.

⁷ Majoya Jesosaa pea ecueabajiji'ya isajea cajo eyaya shajja'ajjanaje pea aquiana eshe eyajo. Ohuaya jama iyaame acanaje ba'a: —¡Poecue!

⁸ Jamajjeya jjeya nei eyaya banaje mapichi jahua poeyani. Ohuaya mapichija edaasa biajje aniya quea huiso nee nee mano mee caje'yo. Jamajjeya oya Jjamano mee'equi'yojji bajjani. Mano mee ca'yajje ojjaña poqui mee caje'yo emano'yo sajaa huasijke. Oya huohui canaje cuaa jama ba'a: —¡Quea huiso nee nee mano mee'yocue ojjaña meshijo ba'eca! ¡Oe dejja mano mee'yocue; beca cuana a'a mano meeiji! ¡Jamaya amajamajacue ojjaña meshijo ba'e cuana! ¡Quea huiso mano mee'yocue jjaquecuaquianijo; bobi chamajo pea'ai, emanomeejjiyo pea'ai mano mee'yocue! ¡Ijjiacajji quea mase cuaa dejja quea huiso ijjia mee'yocue pea'ai!

⁹ Majoya Jesosaa, ma ñajjajja sho'i equecua'yo jayojjaa pea ecueabajiji'ya isajea cajo eyaya banaje quea huiso Jesosaja epeeiji yahuajo mano'yo cuana eyajo nequi'yo. Pea cuaa oya cuana quecua ca'yonaje Eyacuiñajji esaohi jama ajji poanijojo, Jesosaja esaohi huohujjijojo pea'ai. E'e, oya cuana jiquio jama ba'a: Jodio cuaa ñajjajjaja ebacua cuana mei e'iya biajje cuia cajje na' cuayaquianinaje mimishi cuijeal'yojji jayojja jama dejja cuaa Jesosaja epeeiji cuana quecua ca'yajje onajaya ena' cuayaqui'ya poa. ¹⁰ Jamajjeya oya cuana taaanaje jama ba'a: —Emeshi Mese nei, miya quea pame nee; ojjaña miyaya aña. Huohui majje jamaya poani. ¡Bacue oe, dejja mimishi cuaa ecuana quecua ca'yonaje! Jamajoya ¡ache shono shai ojjaña quea mimishi ojjaña meshi cuanajo ba'e quea nee nee po meeje'yo miyaya? —oya cuana poanaje.

¹¹ Eyacuiñajjiya oya cuana quia canaje daqui oshe quea ao nee nee. Ona nijje miminaje jama ba'a: —Pea cuaa miquianaya quecua ca'yonaje ecuea esaohi huohujji poanijojo. Miquea edoe mese cuana ecuea epeeiji cuana enije chacochacoani pea cuaa quecua caje'yo pea'ai. Jamajjeya ¡ishoa socue! Quecuajeyo cajo, eyaya dejja mimishi cuana quea nee nee po meeje'yo —Eyacuiñajjiya acanaje.

¹² Majoya Jesosaa pea ecueabajiji'ya isajea cajo eyaya banaje jama ba'a: Meshi huehuahuehuhanaje janobajjima nei. Eshequi quea apo nee

nee poanaje, daqui tehue nei jayojja poanaje. Ba'i quea huo'o nee, ena' jayojja poanaje.¹³ Majameta cuana jjacajjaqui majje jijijjioquenaje meshi yasijje, beni pajijiya acuijjajja etahua jeahuojojea cani jayojja poanaje. ¹⁴ Eyatahuatagua chama'yo tii poanaje. Jjahuejjajeaqui majje yoquise esipi ejjequijeapiihui nequi jjajjajjaqui'yani jayojja poanaje pea'ai. Eyiyo, nasi cuana pea'ai jjaajaajeaqui majje jjasheshojequinaje meshi huehuahuehuajo. ¹⁵ Jamaya emeshi mese cuana poanaje pea'ai; jeabichajea'yonaje ojjaña. E'e, jiquio jama poanaje ba'a: Emeshi mese cuana, dejja huoojeajji cuana, dejja quea aquiana huiso cuana, sohuinano mese cuana, dejja etii cuana, dejja ehooanjeajjima' cuana, dejja ehooanjeajjiji cuana pea'ai jja'aniquehuaqui canaje jjani cuana huasijje, eyiyo cuana huasijje pea'ai. ¹⁶ Ojjaña jiquio dejja mimishi cuana quea mete nee nee poanijo siasianaje jama ba'a: —Eyacuiñajji ojjaña huoojeajji oya yani. Jesosa ñajajja sho'i equecua'yo jayojja yani pea'ai. Eseyá quea mimishi poanijo, oya cuana quea quene nee poani ese nijje. ¡Jamajoya eyiyo cuana, mei ai cuana pea'ai ecuana biajje ca'loqueahua, Eyacuiñajjiya eseya eba ca cuahuajje, Jesosaa eseya quea nee nee epo mee ca cuahuajje! ¹⁷ E'e, oya cuana poeyani ojjaña quea mimishi napaa. Ojjaña eseya manoje'yo, de —jama siasiameya dejja mimishi cuana poaje.

Jesosaja epeejji bahua tehue canaje Jodio cuanaja ojjaña ebajji

7 ¹ Majoya eyaya banaje ebeca pee pea'ai esohuidojojji cuana. Eyacuiñajji onijke miminaje beni cuana ehooanjeajji pojjeamajo. Beni quea quemó dejja cuana napajji meshi cuana huasijje, bae ai cuana huasijje, acui cuana huasijje epoqui poaje jjejojoya iña cani esohuidojojji cuua. ² Majoya eyaya pea esohuidojojji banaje; eshequi poeje mijijje poeyanaje. Ohuaya aquiana etehuejji ye canaje Eyacuiñajjiya epeejji cuana bahua tehuejji ojjaña ebajji. Ma esohuidojojji ebeca pee pea'ai cuana huasijje taaaanaje meshi cuana, bae cuana pea'ai enapa ca poaje jjejojo. Jama poanaje ba'a: ³ —¡Ishoa socue! ¡Meshi, bae ai, acui cuana pea'ai a'a jinapajji so'o! ¡Eyaya Eyacuiñajjiya epeejji Jodio cuana Eyacuiñajjiya bajjani ojjaña ebajji cabahua tehuesahua! —ma esohuidojojji poanaje.

⁴ ¿Ache huiso tehue canaje ebahuajje Eyacuiñajjiya bajjani ojjaña ebajji? Eyaya shajja'ajjanaje jama ba'a: —Jodio cuana Eyacuiñajjiya bajjani quea huiso nee nee tehue canaje ebahuajje, 144.000 huisome. Jodio etiiquianaja Isaenija bacua ejja 12 cuana poa. Ojaya osecua cuana tehue canaje. ⁵ Jama tehueme acanaje ba'a:

Jodaja osecua cuana 12.000 huisome;
 Shobenija osecua cuana 12.000 huisome;
 Janeja oya jayojjaya 12.000 huisome;
⁶ Aseneja oya jayojjaya 12.000 huisome;
 Netanija jamaya pea'ai 12.000 huisome;
 Manaseja osecua cuana 12.000 huisome;

⁷ Simeonija osecua cuana 12.000 huisome;

Nemija osecua cuana 12.000 huisome;

Isacanija osecua cuana 12.000 huisome;

⁸ Sabononija oya jayojjaya 12.000 huisome;

Joseja oya jayojjaya 12.000 huisome;

Bejamija jamaya pea'ai 12.000 huisome.

Mahuisoya Eyacuiñajji bajjani tehue mee canaje Jodio cuanaja ebahuajje.

Quea huioso nee ojee nequi daqui oshe huosho'yo epo

⁹ Majoya eyaya banaje quea huioso nee nee pea cuana, Jodio pojjeama ojee echicha'yo nequi, daqui oshe nee nee huosho'yo epo. Quea huioso nee nee poanijojo esicojji pojjeama. Oya cuana ojjaña meshijo ba'e, ojjaña cuiñajji ba'e pea'ai poeyani. Dejja tehue cuana, Ese Ejja cuana, dejja nei cuana, ojjaña de, poeyani. Ojjaña pea esohuijo mimiani cuana poeyani pea'ai. Ojjaña oya cuana Eyacuiñajji cojja nei nequi. Cuanaya Jesosa ñajjajja equecua'yo jayojja cojja nei nequi yasijje poeyani ojjaña. Onajaya daqui ao quea oshe nee nee. Onaaya jjememe iña jeasohua cani Jesosa bihuajji. ¹⁰Ojjaña cuana taaanaje jama ba'a:

“Eyacuiñajji, miyaya ojjaña huoojeaña. Jesosa, miya mano'yonaje ñajjajja equecua'yo jayojja. E'e, miyaya ecuanaya ba'e tiitii meeaña”.

Jamaya acanaje cuaa.

¹¹ Majoya ojjaña esohuidojiji eyajo cuana Jesosaja epeejji etii pejjejo nequi, ebeca pee pea'ai aquiana eshe cuana pejjejo nequi pea'ai, Eyacuiñajji ma ojjaña yiyesama neijke ani yasijje jjanequichipiquinaje. Eyacuiñajji ojjaña huoojea'yojji poani bihuia canaje esohuidojiji cuanaa ecui'oshajjajo nequiya. Jama poanaje ba'a:

“Jamaya capo'yahua, Eyacuiñajji! Miya quea pame nee nee. Ojjaña miquea eba. Miya shajja'ajjaña tii tii ecuanaaya. Miya ojjaña huoojeajji enequi tii tii. Ojjaña ecuanaaya miya bihuia tiitii aña.

¹² Miya quea ca'a nee neejo ojjaña miyaya aña tii tii. ¡E'e, jamaya capo'yahua tii tii!”

Ojjaña esohuidojiji jamaya sohuicuayanaje.

¹³ Majoya Jesosaja epeejji etiiya eya huohui'ajja canaje jama ba'a: —Huani, ojjaña jiquio echicha'yo nequi daqui oshe nei huosho'yo epo ¿a'a miquea eba? ¿Achejje shai oya cuana poeyani so'o?

¹⁴ Jamajjeya eyaya oya jama anaje ba'a: —Chojja, ecuea ba jjima. Miyaya ca ya ca oe baña, de. ¡Che iña oe huohuicue!

Ohuaya eya saja'a canaje jama ba'a: —Onaya ba'e'yonaje meshijo. Jesosa nijje jjapeequianijo, dejja mimishi cuaa oya cuana napa huicha'ahuicha'a canaje. Jiquio ecua dejja daqui oshe tajja cajje quea boejea nee nee poani jayojja jama Jesosaa ojjaña mimishi cuijea ca'yajje quea boejea nee nee poani. E'e, Jesosa ñajjajja sho'i equecua'yo jayojja poanaje. Ojaya ena'

cuayaqui majje ojjañaja mimishi cuijea'yoiji poanaje. ¹⁵ Jamajjeya oya cuana nequi mee ca'yani Eyacuiñajji cojja neijo eyajo. Jomajo onaaya Eyacuiñajji nijje chaco tiitii cani quea bihui nee nee. Eyacuiñajji ojjaña huoojea'yoiji poani. Ohuaya ojaya epeejji cuana jaahuana tiitii cani. ¹⁶ Ojaya epeejji cuana quea shoe pojjeama poaje'yo. Quea nabataja po ajja pea'ai. Eshequijo quiyo'yo ajja, quea mano pol'yo ajja pea'ai. ¹⁷ E'e, Jesosa ñajjajja equecua'yo jayojja Eyacuiñajji pejjejo nequi. Jiquio ecua ñajjajja cuiñajjiya ñajjajja cuana jaahuana cani, ena eteo ishi mee cani jama jayojja Jesosaa ojaya epeejji cuana jaahuana cani. Ojaya e'ishijji ishi mee majje ba'e tiitii mee caje'yo onijje pea'ai eyajo. Eyacuiñajjiya jaahuana canijo, oya cuana quea yeno po ajja. Pa'yo ajja poaje'yo —jamaya Eyacuiñajjiya epeejji etii poanaje.

Pea ecueabajiji'ya isa canaje ma me oejje beca oe poanaje

8 ¹Majoya Jesosaa pea ecueabajiji'ya isa canaje. Jamajjeya oijaña ecueabajiji'ya me oejjie beca huisome'ya oeyejje nei isajea ca'ya poa. Jamajjeya oeyejje nei ecueabajiji'ya isa ca'yajo, oijaña cuana eyajo ani jeca neinei po'yonaje. ²Quijje pishana eyaya banaje me oejjie beca esohuidojojji Eyacuiñajji cojja nei nequi. Oya cuana huasijje eshe'anai jayojja me oejjie beca quia mee canaje Eyacuiñajjiya emiajji.

³Majoya eyaya banaje pea esohuidojiji. Ohuaya shiyeshiye dahuajji mei huo'o quea nahue iñanequia cani mei huo'o e'iya aquiana dahuajji pejjejo. Oya quia canaje cuaa madeja pohui jayojja quea shiye nee nee edahuajeajji Eyacuiñajji bihuiajji. Maya dahuajea canaje mei huo'o e'iya biajje, ma Eyacuiñajji anioqueani pejjejo. Jiquio ecua madeja pohui dahuajea cajje huichacha quea shiye ba'esohuaquiani jayojja jama Eyacuiñajjiya epeejji cuanaja emimi onijje eyahuasijje ba'esohuaquianijo Eyacuiñajjiya shajja'ajja cani. ⁴Jamajjeya madeja pohui jayojja quea shiye nee nee esohuidojijiya eme jjotojo ani quiyo nequinaje. Huichacha ba'esohuaquinaje Eyacuiñajji yasijje. Ma huichacha ba'esohuaquianijo, Eyacuiñajjiya shajja'ajja canaje Jesosaja epeejji cuanaja emimi onijje. ⁵Majoya ma esohuidojijiya cuaqui cojja sha mei e'iya biajje ani iya canaje shiyeshiye dahuajjiyo. Majoya eyajo nequiya ohuaya cuaqui cojja sha shiyeshiye dahuajjiyo ani jeaoqueajea canaje meshi yasijje. Majoya cueji cuana taaa poanaje janobajjima nei. Pojjeje baa siyoo cuana poanaje. Meshi huehuahuehuanaqe pea'ai. Quea shajjaquijjo pea'ai poanaje.

Emiajji cuana

⁶Majoya me oejee becaa, ⁷esohuidojojji cuaa emiajji cuana iña canaje emiajji. ⁷Ebionei esohuidojojjiya ojaya emiajji ana'ai she'ana jayojja mia canaje aquiana quea huiso meshijo edahuajeajji. Mia cajo, quea huiso mejia jjacaljaquinaje oquequinaje meshi yasijje. Pojjejjeya quea huiso meshi dahua canaje. Ena' oquequinaje meshi yasijje pe'a'i. Jamaijeya meshi

quea huiso quiyonaje. Oe meshi quiyonaje; beca quiyo jjima poanaje. Pea quiyonaje; beca quiyo jjima poanaje. Jamaya poanaje ojjaña meshijo. Acui cuana jamaya poanaje pea'ai. Oe acui quiyo'yonaje; beca acui quiyo jjima poanaje. Ojjaña huenihuensi quiyo'yonaje. Chama'yo tii poanaje.

⁸Me oeje oe pea esohuidojiji cuanaja mia jjima ojaya emiajji cuana. Jamajjeya majoya pea esohuidojijiya ojaya emiajji ana'ai she'ana jayojja mia canaje. Taaa'ylo majje ohuaya aquiana eyiyo quea quemo nee, quea jiji nee jayojja jeaoqueajea canaje bae ai cuana huasijje. Quea huiso bae ai quea huo'o poanaje ena' jayojja. Ena' jjejojo quea ihui poanaje. ⁹Jamajjeya quea huiso nahuoo mano'yonaje. Oe nahuoo mano'yonaje; beca mano'yo jjima poanaje. Jamaya poanaje ojjaña nahuoo cuana. Quea huiso bishe ai hui'il'yonaje. Oe bishe hui'il'yonaje; beca hui'il'yo jjima poanaje. Jamaya poanaje ojjaña bishe cuana.

¹⁰Me oeje huiso esohuidojiji cuanaja emiajji cuana mia jjima so'o. Jamajjeya majoya pea esohuidojijiya ojaya emiajji mia cajo oe majameta eyajo nequi quea jiji nei, cuaquijiji quea quemo jayojjaya oquequinaje quea huiso cuei yasijje. ¹¹Maya majameta ma bajjani ba'a: Quea Pase Nee Nee bajjani. Jamajjeya quea huiso cuei, ena eteo pea'ai quea tai poanaje. Oe cuei quea pase nee nee; beca cuei pase'ama poanaje. Jamaya poanaje ojjaña ena. Jamajjeya quea huiso dejja cuana mano'yonaje ena quea pasejo.

Ebeca pee pea'ai huisomeja esohuidojiji cuanaja emiajji mia jjima so'o. ¹²Jamajjeya majoya pea esohuidojijiya ojaya emiajji mia cajo eshequi jaasohua pishana majje jiji ajja, quea misi poanaje. Mecajje ba'i jamaya poanaje pea'ai. Jaasohua pishana majje quea misi poanaje. Majameta cuana quea misi poanaje pea'ai: Oe majameta jiji ajja; beca cuana jiji canaje. Jamaya poanaje ojjaña majameta.

¹³Majoya eyaya banaje huipa cuabesani. Oya taaanaje jama ba'a: —Quea yeno nee nee poaje ojjaña meshijo ba'eca cuana. E'e, pea beca pee jjimaa esohuidojiji cuaa emiajji eshe'ana jayojja mia caje. Mia cajo, quea nee nee poaje quea huiso dejja cuana —jama taaameya poanaje huipa. Jamaya poani eyaya banaje, Huaniya.

9 ¹Majoya pea esohuidojijiya ojaya emiajji mia canaje. Mia cajo pea majameta jayojja meshi yasijje oquequinaje eyaya banaje. Oya majameta jayojja huasijje quia mee canaje Eyacuiñajjiya esecue cojja quecuaca'apejo meeji, yave quia canaje jjani ai quea doe nee nee ca'apejoji. ²Jjani ai quea doe nee nee ca'apejo cajje eyaya banaje huichacha quea quemo ba'esohuaquinaje que quea quemo nee nee dahuaje cani jayojja, quea jiji nee nee poani jayojja. Eshequi quea misi poanaje huichacha quea quemojo. ³Huichacha quea quemojo ani satajje jayojja cuayaquinaje, satajje ejja pojja'a. Quea satajje moo nee nee poanaje. Meshi yasijje poeyanaje. Ma satajjea ehua'o cuana aji jayojja, quimajji. ⁴Satajje quimajji huohui canaje Eyacuiñajjiya jama ba'a: —¡A'a huenihuensi napajji! ¡Acui sisi, acui quea quemo pea'ai a'a napajji! ¡A'a napajji ecuea epjeeji ma ebahuajje ecuea bajjani ecue etehue'y! ¡Ecuea epjeeji pojeama ca

ca napacue, ma ebahuajje ecuea bajjani tehue jjima! ⁵ ¡Oya cuana a'a mano mee'yojj! ¡Quea nee nee oe po meecue me oejje ba'ime, 5 ba'ime! —poanaje.

Jamajjeya equimaa quecua majamaja cajje quea nee po mee canaje, ajiya quecua cani jayojja. ⁶ Jamajjeya dejja mimishi cuana mano'yo sa poaje ma me oejje ba'ime. Jamatii mano'yo jjima poaje.

⁷ Ma satajje ejja cuana jiquio jayojja jama ba'a: Yamiji mapichi ai ejjaquecuaquijji dojojjji jayojja. Dejja jayojja cojjame. Mapichi mei huo'o quea nahueja sapa huahuo iya jayojja. ⁸ Satajje ejja cuana saoiji de, epona jayojja. Ojaya ese' quea ao, ibia jayojjaya. ⁹ Ese'ojje baa daqui quea moo eba'e huana. Oya cuana cuichojji pea'ai. Ojaya ecuicho cuana quea shajjaquijjo, mapichi quea huiso nee nee cuajicuajibeansi jayojja jama poani, mapichiya pea ejjaquecuaquijji dojo cani pea cuana quecuaa. ¹⁰ Satajje ejja cuanaja ehua'o aji jayojja, quimajji. Dejja cuana quecua caje equimaa. Quea nee nee po mee caje'yo me oejje ba'ime. ¹¹ Satajje ejja cuanaja ehuoojeajji yani. Oya jjani ai cuiñajji, ma emano'yojaa nequi quea doe nee nee cuiñajji. Jodio cuanaja esohuijo ojaya bajjani Abodon bajjani; Jieno cuanaja esohuijo oya Aponiono bajjani; Ese Ejjaja esohuijo ojaya bajjani Ojjaña Quea Yeno Po Mee'yojjji bajjani.

¹² Jamajjeya ebionei epojja cuana quea nee nee poani apoa acanaje. Quijje pishana quea camaja nee nee poaje. E'e, beca esohuidojorji cuanaja emiajji mia jjima.

¹³ Majoya pea esohuidojorjiya ojaya emiajji mia canaje. Mia cajo eyaya pea shajja'ajjanaje. Oya mimiani ebeca pee pea'ai eshe'ana yiyesama neijo nequi. Ma eshe'ana cuana yani mei huo'o e'iya aa biajje, Eyacuiñajji cojja nei nequi. ¹⁴ Eyacuiñajji jama poanaje ba'a esohuidojorji nijje, ma jjeya nei mia canaje nijje ba'a: —Ebeca pee pea'ai esohuidojorji cuana yani cuei quea quemodo, Eopate cuei yobijo. ¡Maya esohuidojorji cuana jomajo ejeyo nequi pichojeaqui'yocue! —Eyacuiñajji poanaje—. ¹⁵ E'e, eyaya ma esohuidojorji cuana nequi meeaña jjeya nei ehuoojeajji jayojja. Jiquio shequiajajo, jiquio ba'ljo, jiquio pojajjo, jiquio eshequi nequi pojajjo pea'ai ehuoojeajji. Poquije mimishi cuana quea huiso nee nee quecuaa. Jama quecuame acaje ba'a: Oe dejja quecua caje, becanejjijji pea'ai quecua jjima acaje. Jamaya acaje'yo ojjaña dejja cuana ojjaña meshijo ba'eca cuana —jamaya Eyacuiñajji poanaje.

E'e, ma esohuidojorji cuana pichojea mee'yo majje huuoea caje jjaquecuaquiy. ¹⁶ Dejja mase mapichija edaasa biajje ani huuoea caje quea huiso nee nee. Peaa eya huohui canaje ache huiso dejja mase cuana mapichija edaasa biajje ani. Quea huiso nee nee, dosciento millone, 200.000.000 huisome poaje, de.

¹⁷ E'e, Jesosaa eya, Huani ecuea ebajji ba mee canaje mapichi cuana, dejja cuana mapichija edaasa biajje ani pea'ai. Eyaya oya cuana banaje jama ba'a: Ojaya ese'ojje baa daqui quea moo ba'ehuana canaje ona quecua ca'yo poaje jjejojo. Baa daqui quea moo quea siyo, quea tahuwa nee, quea jahua nee

jayojja pea'ai. Mapichi cuanaja esapa cuana ibia naa asha jayojja. Enabajje cuayani cuaquí jiji jayojja, huichacha, beni quea ihui, quea pase, mei quea ihui jayojja pea'aiya. ¹⁸Oya cuaquijo, huichachajo, beni quea ihuiyo pea'ai quea huiso dejja mimishi cuana manoje'yo. Oe dejja mano mee caje'yo; becanejjiji pe'a'i mano'yo jjima poaje. Jamaya poaje ojaa dejja mimishi cuana ojaa meshijo ba'eca cuanaya. ¹⁹Oya mapichi ai cuaa quea huiso nee nee mano mee caje'yo; cuaquijjiya ojaya enabajje cuayaniya mano mee caje'yo. Ojaya ehua'ohua pea'aiya dejja cuana quea nee nee po mee caje. Mapichi cuanaja ehua'o cuana peyo jayojja, sapame ehua'o icuijo enequi ese'. Maaya dejja mimishi cuana ijija cajje quea nee nee poaje'yo.

²⁰E'e, Eyacuiñajjiya dejja mimishi cuana napa majamaja mee ca'yonaje. Jamatii, quea huiso ma pojajo mano'yo jjima poanaje cuana. Jamatii onaya mimishi cuana pajea sa po'yo ajja. Eshahua cuana bihuia pajea'yo ajja, eyacuiñajji nisho cuana bihuia pajea'yo ajja pea'ai. Eyacuiñajji nisho acanaje cuaa, mei huo'o quea nahue, mei oshe quea nahue, mei jahua quea nahue, mei nahue'ama, acui pea'ai eyacuiñajji nisho acanaje. Maya eyacuiñajji nisho cuana shajjama', jiojjima', cojjama' pea'ai. ²¹E'e, maya dejja cuana quea mimishi tii tii poanaje pea quecuajji cuana, jjadasiaquijji cuana, siipojji cuana, pea cuana cojjorji poani cuana. Mimishi cuana pajea'yo ajja; quea mimishi po tiitii'yonaje.

Pea esohuidojorji Huaniya ba canaje

10 ¹Majoya eyaya, Huaniya banaje eyajo pea esohuidojorji ba'eoqueani meshi yasijje. Oya bo oshe biajje nequi. Ojaya daqui bo oshe nei nei jayojja. Ojaya sapa biajje eshijje quea bame nee nee jayojja ejjanequitoqui'yo nequiani. Ojaya ecojja quea jiji nee nee eshequi jayojjaya poani. Ojaya equise jijiani, equi yamajjana acui ca'a jijiani jayojja jama poani. ²Ohuaya ejee etehue'yo iña cani emeya. Ecueabajiji'ya oeyejje nei isajea ca'yajo jjajeapichojjoqui'yonaje. Oya epii nequi. Ojaya ebianei jiojji bae ai biajje nequi; shani jiojji ca meshi yasijje nequi. ³Oya taaaanaje janobajjima nei ibia quea quemo nee nee mimiani jayojja. Ojaya esohui me oeje beca huiso cueji jayojja poanaje. ⁴Cueji cuana jayojja shajjajja majje eyaya ojaya esohui tehue'ajjanaje. Esohui tehue jjimahuajo pea eyajo nequi enijje miminaje jama ba'a: —Chojja. ¡Me oeje beca cuejija esohui a'a tehuejji! ¡A'a huohuijji ojaya esohui! —poanaje.

⁵Majoya ma esohuidojorjiya bae ai biajje nequiya, meshijo nequiya pea'aiya oja eme' ebianei eme' jeasohua canaje eyahuasijje. ⁶Majoya oya miminaje jama ba'a: —Eyacuiñajjiya ojaya esohui ma ecua ohuaya yahuajo huohui canaje jamaya e'e jojo nei jjeyahua nei acaje'yo. Oya quea ca'a nee nee poani. E'e, oya ba'e tiitiiani; eya cuana, ojaa aquiana eyajo nequi pea'ai pana ca'y poa; meshi cuana, ojaa aquiana cuana meshijo nequi pea'ai pana ca'y poa. Bae cuana, ojaa aquiana cuana bajio ani pea'ai pana ca'y poa,

Eyacuiñajjiya —jamaya esohuidojiji ma ebianei jiojjije enajo nequi, shani jiojjije meshijo nequi poanaje; ohuaya huohui canaje jama ba'a: —Jjeya apoa. Ma ecua ohuaya huohui canaje jamaya jjeyahua nei Eyacuiñajjiya acaje'yo. ⁷Yahuajo Eyacuiñajjiya ojaya esohui huohujji cuana huohui mee ca poa ma ohua quijje nei acaje. Quijje pishana pea esohuidojijiya quijjeyejje neiya ojaya emiajji mia caje. E'e, ojjaña ba mee caje Eyacuiñajjiya acaje cuana ma yahuajo oja dejja cuana ba mee jjima poa, ma ohua quijje acaje pea'ai, maya yahuajo nei onajaya quea quehua poanaje —jamaya ma esohuidojiji poanaje.

Me oeje oe esohuidojiji cuaa emiajji cuana mia canaje. ⁸Majoya oya eyajo nequi mimi o'oyanaje enijje jama ba'a: —Huani, ¡ejee etehue'yo jjeshecue! ¡Ma esohuidojiji meshijo, ena ojjojo pea'ai jiojji nequija emejo nequi ejee etehue'yo jjeshecue!

⁹Jamajoya eya poquinaje esohuidojiji yasijke. Eyaya oya huohuinaje jama ba'a: —¡Quiacue mo ejee etehue'yo!

Jamajjeya eya ohuaya huohui canaje jama ba'a: —E'e Huani, ma'aje. ¡Ejee etehue'yo ijjiacue! Miya ijjiachte quea biquia nee poaje huini jayojja. Jamatii miya ijjiachte quea pase nee see aijo poaje —ma esohuidojiji poanaje.

¹⁰Jamajoya eyaya ejee etehue'yo jjeshe majje ijjianaje. Quea biquia huini jayojja poanaje. Jamatii eya ijjiachte quea pase nee poanaje see aijo. Jamajjeya eyaya banaje ma esohui etehue'yo quea huiso cuana quea nee poaje'yo. ¹¹Majoya pea eyajo nequiya eya huohui ca o'oyanaje jama ba'a: —Huaniya, ¡quea huiso dejja cuana huasijke, ojjaña meshi cuana huasijke ojjaña pea mimime cuana huasijke, quea huiso emeshi mese yasijke pea'ai huohuiquicue ma Eyacuiñajjiya quijje acaje'yo! —jamaya poanaje eyajo nequi.

Beca esohui huohujjiya esohui huohui canaje

11 ¹Majoya Eyacuiñajjiya pea eyajo nequiya eya quia mee canaje acui e'ipia'ajjajji. Ohuaya eya huohui canaje jama ba'a: —Huani, ¡Eyacuiñajjiya equi ipia'ajjacue! ¡Mei e'iya aa aquiana dahuajji pea'ai ipia'ajjacue! ¡Dejja cuana jomajo nequi Eyacuiñajji bihuajji pea'ai sicocue! ²¡Jodio pojjeamaja e'anijji Eyacuiñajjiya equi pejjejo ani a'a ipia'ajjajji! Jodio pojjeama cuaa Eyacuiñajjiya epjeejji cuana napa caje beshahua nei ebeca pee pea'ai shequiajame, 42 ba'ime. Jodio ojaya epjeejji cuana Eyacuiñajjiya quea boti nee, ojaya Jenosanena cuiñajji quea boti nee jayojjaya. ³Eyaya ecuea becamejjiji pea'ai esohui huohujji huoojeaje dejja cuana huasijke ecuea esohui huohuiya. Eyaya oya cuana ecue sohui huohui meeje quea huiso cahuijo, 1.260 cahuime. Ohuaya pea daqui huosho caje, dejja emano'yo quea yeno nee poani jayojjaya. Jamajjeya ojjañaaa ba caje ojjaña meshijo ba'eca cuana quea nee poaje. ⁴Ma ecuea becamejjiji pea'ai esohui huohujji cuana beca onimo acui cuana jayojja. Oya cuana beca cuaquijiji nequijiji Eyacuiñajji cojja nei nequi jayojja pea'ai.

Jamajjeya ojjañaa ba caje Eyacuiñajjiya oya cuana jaahuana cani.⁵ E'e, onaa esohui huohuijji napa cajo cuaqui cuayani ojaya enabajje, o napajji poani quiyojeaje dejja mimishi cuana. Jamaya ojjaña manoje'yo, ma beca esohui huohuijji napajji poani.⁶ Eyacuiñajjiya jiquio esohui huohuijji quea ca'a po mee cani. Jamajjeya ohuaya jama acaje'yo ba'a: Eyacuiñajjiya esohui huohuijji poaniya ohuaya ena chama' po mee cani. Quea jabo po mee cani. Ohuaya sa majje ena' jayojja po mee cani cuei cuana, bae cuana pea'ai. Ohuaya sa majje ojjaña cuana napa cani pea'ai.

⁷Majoya jiquio beca esohui huohuijji cuaa huohui pajea majje, oe aquiana quea mase nee nee ma jjani ai quea doe neejo ba'e poeje ma esohui huohuijji cuana cuiajeara. Jeabichajea majje cuiajea caje'yo.⁸ Oya cuana mano'yo majje jamatii jaaje ejiojjijo, Jenosanena cuiñajjiyo. Ma cuiñajjiyo pea cuaa yahuajo Jesosa, ese jaahuanajji acui ecueatalapeejo ba'ehuanasohuajea canaje. Dejja cuana Jenosanena cuiñajjiyo ba'eca quea mimishi poaje, ojjaña Sonoma meshijo yahuajo nei ba'yá poa jayojja, Ejito meshijo ba'eca jayojjaya pea'ai quea mimishi poaje.⁹ Jamajjeya quea mimishi poaniya jjejojo Eyacuiñajjiya esohui huohuijji poani mano'yajo emojejiji pojjeama. Ejiojjijo tii oya jamatii jaajeaje pea beca peejjima cahuime. Ojjaña cuiñajjiyo ba'eca cuana, ojjaña pea esohuijo mimiani cuana ojjaña meshijo ba'e pea'ai poeje ma esohui huohuijji emanoyojaa baa.¹⁰ Ojjaña dejja mase cuana quea bihui nee nee poaje ma esohui huohuijji mano'yonajejo. Jamajjeya aquiana quia caje onajaya epeejji cuana huasijje sosema!. E'e, ma esohui huohuijjiya ojjaña quea mimishi poani napa canaje quea huiso cahuime. Jamajjeya o mano'yajo quea bihui nee poaje ojjaña mimishi cuana.

¹¹ Jamatii pea beca peejjima cahuime poajo Eyacuiñajjiya ma beca esohui huohuijji shequi mee caje o'oya. Nequisohua mee caje o'oya pea'ai. Jamajjeya ojjaña dejja mimishi cuana oya cuana eshe o'oya ba majje quea mete nee nee poaje.¹² Majoya ma esohui huohuijjiya shajja'ajja caje pea eyajo nequi mimi nequi onijje jama ba'a: —¡Yacua oe poe'yocue!

Jamajjeya oya cuana bo oshe biajje nequi sohuaquije'yo eyahuasijje. Sohuaquije'yo o quecuayojji epo cuaa ba caje.¹³ Majoya dejja mimishi cuaa ba caquijo tii, Eyacuiñajjiya meshi huehuahuehua mee caje'yo. Quea huiso equi jaabichajea meeque caje'yo. Dejja cuana Jenosanenajo ba'e manoje'yo quea huiso nee nee, 7.000 huisome. Pea cuana mano'yo jjima poaje. Oya cuana quea mete nee nee poaje'yo. Jama poaje ba'a: —E'e de, Eyacuiñajji eyajo ba'e quea pame nee nee, quea ca'a nee nee —jamaya quea huiso poaje.

¹⁴E'e, jamaya ma beca esohuidojoojjiya mia majje dejja mimishi napa caje'yo. Quijje pishana pea esohuidojoojjiya mia cajo dejja mimishi cuana ojjaña meshi cuanajo ba'eca cuana napa caje'yo pea'ai.

Pea esohuidojijiya mia canaje

¹⁵Majoya pea esohuidojijiya ojaya emiajji mia canaje. Mia cajo pea cuana eyajo ba'e janobajjima nei sohuicuayanaje jama ba'a:

“Eyacuiñajji, miya ojjaña huoojeajji poani, ojjaña meshijo ba'eca cuana huoojeajji poani. Miyaya huoojeanaje Quito, mique huoojea'yo ojjaña cuana jaahuanajji. ¡Jesosa Quito ojjaña huoojeajji po meecue! ¡Ohuaya ojjaña cuana cahuoojea cahua tii tii!”

Jamaya oya cuana poanaje.

¹⁶Majoya quea huiso Jesosaja epeejji etii cuanaa, 24, Eyacuiñajji cojja nei e'anioque aniya Eyacuiñajji bihuia canaje ecui'oshajjajo nequiya.

Jama poanaje ba'a:

¹⁷“Eyacuiñajji, miya oe nei quea ca'a nee nee po tiitiiani, ojjaña huoojeajji poani tii tii pe'a'i. Ecuaaya miya bihuiaña miya quea pame nee nee poanijo. E'e, miya yahuajo nei nei ani tiitiia poa. Jjeya miya ani tiitiiani pe'a'i. Ecuaaya miya bihuiaña miya ojjaña huoojeajjijojo. E'e, miya quea ca'a nee nee po tiitiianijo miya oe nei ojjaña huoojeajji poani tii tii. ¹⁸Ojjaña dejja mimishi cuaa miya jeabichajea sa acani. Jamatii miya ona nijje quea quene nee nee poaje jjeya nei; quea nee nee po meeje'yo. E'e, jjeya miyaya dejja mimishi cuana quea nee nee po meeje, oya ojjaña meshijo ba'e napajji poanajejojo. E'e, ojjaña yahuajo nei emanoy'yo jjeya miyaya huohuije miquea ejjashahuabaquijji onajaya eba'ejjijo. Dejja quea mimishi poa quea nee nee po meeje'yo. Miquea esohui huohuijji cuaa, Jesosaja epeejji cuaa miquea esohui jayojja jama acanijo ca ca miyaya quea bhuai nee po meeje'yo. Minijje ani tiitii meeje'yo pe'a'i ojjaña miquea epeejji, esho'i cuana, etii cuana pea'ai”.

Jamaya Jesosaja epeejji etii cuana poaje.

¹⁹Majoya eya ba mee canaje Eyacuiñajjiya equi eyajo ani. Eyiye dojjo ba mee canaje. Jomajo Eyacuiñajji yani. Jomajo yani acui equecua quea bame nee, Eyacuiñajjiya esohui etehue'yo huanajji. Ma esohui etehue'yo etiiquianaa Moisesi nijjeya tehue ca poa. Ma esohui etehue'yo eya bajo, pojjeje quea huiso jeaja'a canaje, baa siyoo taaa poanaje, cueji poanaje pea'ai, meshi huehuahuehuanaje, meja jjacajjajequinaje, quea huiso nee oquequinaje pea'ai. E'e, jamaya eyaya banaje.

Epona eshequi jayojja sa'o huo'o jayojja napa canaje

12 ¹Majoya eyaya banaje aquiana ai'ai eyajo, ma Eyacuiñajjiya quijje ohua acaje. Jiquio jama poaje ba'a: Eyaya banaje epona eyajo.

Ojaya daqui quea jiji nee eshequi jayojja. Oya nequinaje ba'i biajje. Ojaya esapa huahuo yani majameta cuana, jiojji miji beca, 12 majameta. ²Oya

siasianaje ebacua neejo. ³Majoya eyaya banaje aquiana ai'ai eyajo, sa'o ai jayojja quea huo'o, sa'o ai ejja pojja'a. Oya quea sapa huiso, me oejje beca, 7 sapame. Oya quea she'ana huiso pea'ai, ome miji pea'ai she'aname, 10 she'aname. Oja sapa cuanajo ejaahuojja jayojja yani pea'ai, me oejje beca ejaahuojja. ⁴Ohuaya iña canaje quea huiso majameta cuana ehua'ohua. Iña majje majameta cuana jeaoqueajea canaje meshi yasijje. Oe majameta iña canaje, beca iña jjima poanaje. Jamaya ojjaña majameta cuana acanaje ma aquiana sa'o ai jayojjaa. Oya sa'o ai jayojja epona pejjejo nequinaje oja bacua ijjiajji nisho, cuayajo. ⁵Jamajjeya ma eponaja ebacua cuayanaje dejja sho'i. Oya ojjaña huoojeajji quea ca'a nee nee poaje'yo. Ohuaya ojjaña shajja'ajja mee caje'yo ojaya esohui. Jamajjeya sa'o ai jayojjaja oya ijji jjimahua peaa ma ebacua dojo canaje eyahuasijje Eyacuiñajji e'anioque ani yasijje. ⁶Majoya ma epona poquicuajicuajinaje quea huesha, meshi quima huasijje. Jomajo Eyacuiñajjiya eponaja eba'e meejjii acanaje. Jomajo Eyacuiñajjiya oya jaahuana canaje quea cahui huiso, 1.260 cahuime.

⁷Majoya eyajo quea huiso nee nee jjaquecuaquinaje. Jama poanaje ba'a: Ma sa'o ai jayojjaa ojaya esohuidojiji quea mimishi, quea huiso nee nee cuana nijjeya jjaquecuaquinaje esohuidojiji pame cuana nijje, Miyeni ojaya esohuidojiji quea pame nee nee quea huiso nee nee nijje. ⁸Miyeni quea ca'a nee nee, sa'o ai jayojja quea ca'a pishana. Jamajjeya Miyeniya sa'o ai jeabichajea majje jeaoqueajea canaje meshi yasijje. E'e, sa'o ai, ojaya esohuidojiji cuana pea'ai nequi tiitii mee jjima acanaje eyajo.

⁹Miyeniya oya cuana jeaoqueajea canaje meshi yasijje. Ma sa'o aija pea bajjani cuana jama ba'a: Peyo nei yahuajo nequia poa bajjani, eshahua nei bajjani pea'ai, Edosiquiana nei bajjani pea'ai, Satanasa. Ohuaya beshahua nei ojjaña cuana ojjaña meshijo ba'eca cuana dasia cani, quea mimishi po mee cani. E'e, ma sa'o ai ojaya esohuidojiji cuana nijje jeaoqueajea canaje meshi yasijje Miyeniya, esohuidojiji quea pameya.

¹⁰Majoya pea eyajo nequi enije miminaje janobajjima nei. Jama poanaje ba'a: —Jjeya nei Eyacuiñajjiya ecuana ba'e tiitii mee cani. Ohuaya Edosiquiana nei jeabichajea ca'yonaje. Jamajjeya oya ojjañaja Emeshi Mese nei poani. Ohuaya, Quitohua ojjaña huoojea cani pea'ai. Oya Eyacuiñajjiya huoojea'yo ojjaña jaahuanajji. Ma sa'o ai jayojjaa, Edosiquiana neiya ojjaña Jesosaja epeejji cuana niñeba cani tii tii, ohuaya esohui siajje acani Eyacuiñajji yasijje. ¹¹Cuanaya Jesosa Quitohua, ma ñajjajja sho'i equecua'yo jayojjaa ojaya epeejji cuana quea boejea po mee cani oya na' cuayaquia poaa jjejojo, poquijeyonajeya jjejojo. Ohuaya ojaya epeejji cuana Edosiquiana nei jeabichajea meesahua cani. Ojaya epeejji cuaa Jesosaja esohui huohui canaje. Edosiquiana jeabichajea mee canaje pea'ai. Mimishi cuaa oya cuana quecua canaje Jesosaja esohui huohuijjii poanijojo. Jamatii ohuaya mete'ama, yeno'ama pea'ai esohui huohui tiitii canaje. ¹²Jamajjeya ojjaña eyajo nequi, ¡quea bihui nee pocue! Ojjaña meshi cuanajo ba'e, miquianaya quea nee nee

poaje'yo Edosiquiana miquiana que jeaoqueajea ca'yonaje jojoya. Oya quea mase nee nee poani. Ojaya eba jama poaje ba'a: Quijje pishana Eyacuiñajjiya oya jeajea caje'yo cuaquí yasijje. Jamajjeya oya oijaña meshijo ba'e nijje quea mase nee nee poaje —jamaya peaa eyajo ba'eya eya huohui canaje.

¹³ Ma sa'o ai jayojja meshi yasijje oquequi'yo majje quea quene nee nee poanaje. Jamajjeya ohuaya epona, ma bacuajji poanaje enaese ocuecuaji canaje eshajomano meejea'yojji nisho. ¹⁴ Eyacuiñajjiya ma epona quia canaje beca ecuicho, huipa jayojja cuichomeya ecuabesajji. Jamajjeya oya cuabesanaje quea huesha, meshi quima huasijje. Jomajo Eyacuiñajjiya oya jaahuana canaje ma sa'o ai jayojja enapa ca poaje jjejojo. Eyacuiñajjiya oya jaahuana canaje quea huiso nee nee cahuime, beshahua nei ebeca pee pea'ai shequiajame. ¹⁵ Majoya sa'o ai jayojja enabajje ena quea quemo ojjajea canaje cuei quea quemo jayojja epona hui'i mee'yojji nisho. ¹⁶ Jamatii Eyacuiñajjiya epona jaahuana canaje. E'e, meshi jjaajjejjequi mee majje ma ena quea quemo meshi yasijje shajadobiqui mee canaje. Oya epona jja'aniquehuaquiñaquinaje quea huesha. ¹⁷ Jamajoya aje oe sa'o ai jayojja quea quene nee nee po majje poquinaje ma eponaja pea ebacua cuana nijje jjaquecuaquiya. Oijaña joya Eyacuiñajjiya esohui jayojja jama ba'yani, Jesosaja esohui e'e jojo nei huohui tiitijji poani pea'ai quecua sa acanaje ma sa'o ai jayojja. Jamaya eyaya, Huaniya banaje.

Aquiana mase bae ai'aijo ani etaja huasijje nequisohuaquinaje

13 ¹ Majoya eya jjacahuibaquinaje bae ai'ai sahuajo nequi. Jomajo eyaya banaje sa'o ai jayojja ishoa cani pea aquiana mase shanei ai jayojja, shanei ejja pojja'a. Oya bae ai'aijo ani cojja cuaya majje nequisohuanaje etaja huasijje. Oya quea sapa huiso, me oeije beca, 7 sapame. Ojaya eshe'ana quea huiso yani pea'ai, ome miji pea'ai, 10 she'aname. Oijaña eshe'anajo yani ejaahuojja jayojja. Oijaña esapajo yani etehue'yo quea tai pea'ai, Eyacuiñajji niñebajji tehue'yo. ² Ma shanei ai ejja jiquio jama ba'a: Oya ibia ecojjopia'yo ai jayojja, ibia chehue ai jayojja jiojjime. Oya ibia naa asha se' quemoajja, quea se' quemo nee nee. E'e, oya quea mase nee. Edosiquiana neiya, Satanasa, sa'o ai jayojja pea'aiya ma shanei ai ejja quea mase o jayojjaya po mee canaje, Edosiquiana nei jayojjaya poanaje. Jamajjeya oya quea ca'a nee poani, quea huiso huoojeajji poani. ³ Oya equecua'ajja'yo jayojja sapame poanaje, ma shanei ai ejjaja esapa. Jamatii jjajeaqui mee ca'yonaje. Jamajoya quea huiso dejja cuaa meshi cuanajo ba'eya ma shanei ai ejjajo quea meteya jjejojo ojaya esohui jayojja jama acanaje. ⁴ E'e, sa'o ai jayojja shanei ai ejja oijaña huoojeajji po mee canaje. Jamajjeya oijaña sa'o ai jayojja bihuia ca'yonaje ecui'oshajjajo nequiya. Shanei ai ejja quea ca'a nee nee poso bihuia canaje cuaa pea'ai jama ba'a: —Pea o jayojja chama'. Chama' o jeabichajeal'yojji epo, de —acanaje cuaa.

⁵Shanei ai ejja ojjaña meshijo ba'e huoojeajji poaje quea huiso ba'ijo, 42 ba'ime. Quea mimi tai nee nee poanaje. Jamajjeya Eyacuiñajji onijke quea quene nee nee poanaje. ⁶Ohuaya Eyacuiñajji eyajo ani ojjaña huoojeajji poani niñeba canaje. Ojjaña Eyacuiñajji nijje nequi niñeba canaje pe'a'i, shanei ai ejja. ⁷Jamatii Eyacuiñajjiya oya jeabichajea jjima. Jamajjeya ohuaya Jesosaja epeejji cuana nijje jjapee nishoqui majje jeabichajea canaje. Jamajjeya ojjañaa ojaya esohui jayojja jama acanaje. ⁸E'e, ojjaña meshijo ba'ecaa oya bihuia canaje. Jesosaja epeejji cuanaja ca ca oya shanei ai jayojja bihuia jjima. E'e, meshi pana jjimahuajo tii Jesosaa, ma ñajjajja sho'i equecua'yо jayojja ojaya epeejjiya bajjani tehue canaje eba'e tiitii mee'yojji. Jamajjeya ohuaya shanei ai jayojja bihuia jjima acani.

⁹¡Shajja'ajjacue oe; jjashahuabaquicue oe! ¹⁰Joya jja'líñaquiani ejeanobiajji quijke onaa oya iña majje jeanobia caje'yo pe'a'i. Ojjaña joya jjajajaquiani manoje'yo; yacua pe'a'i caje'yo cuaa. Jamajjeya ojjaña Jesosaja epeejji cuana quea nee poanijo jamatii mete'ama cajjapee tiitiiquiahuia onijke.

¹¹Majoya eyaya, Huaniya banaje pea aquiana quea mase pe'a'i shaijjami ai quea mase nee jayojja, shaijjami ejja. Oya meshi quipajo ani cuayanaje. Ojaya eshe'ana becamejjiji pe'a'i ñajjajja yahue jayojja. Jamatii ojaya esohui sa'o ai jayojja quea ajjajja epo meejjii. ¹²Ebionei shanei ai ejja jiquio jjeya meshi quipajo ani cuayanaje shaijjami ai ejja o jayojja ojjaña huoojeajji po mee ca'yonaje. Jamajjeya pea shaijjami ejja ma meshi quipajo ani cuaya ojjaña huoojea canaje ma shanei ai ejja esapa jaja'ajja bihuiaa. ¹³Ohuaya, ma meshi quipajo ani cuaya ma dejja ajjima acani acanaje quea huiso nee. E'e, ojjaña dejjaja ebajji ohuaya cuaqui oque mee canaje meshi yasijje. ¹⁴Ohuaya jamaya acanaje ojjaña ma ebionei shanei ai bihuia meeiji. Ma dejja ajjima acani amajjeya ohuaya ojjaña cuana dasia canaje. E'e, ohuaya dejja cuana ebionei shanei ai nisho pana mee canaje epa'yo, ma shanei ai esapa jaja'ajja jjajeaquí'yonaje nisho pana mee canaje. ¹⁵Majoya ma meshi quipajje cuaya poa shaijjami ai ejja shanei ai nisho epa'yo eshe jayojja mimi meeme po mee canaje. Jamajjeya ohuaya jama acanaje ba'a: —¡Ojjaña joya e bihuia ajja iñacue, quecuajea'yocue, oe! —poanaje shanei ai nisho epa'yo.

¹⁶Majoya shanei aiya huohui canaje jama ba'a: —¡Ojjaña cuana, ojjaña tii tehuecue ebahuajje, ebianei emejje pojja'a ecuea bajjani! ¡Ojjaña esho'i, ojjaña etii pe'a'i, ojjaña echacojji cuana, ojjaña echacomeejji cuana, ojjaña quea aquiana huiso poani cuana, ojjaña aema' cuana pea'a'i jamaya tehuecue ecuea bajjani, ecuea ebajji! ¹⁷Ojjaña joya jjatehue meequi jjima aje oe ja'a aquiana cuana jjeshe meeiji! ¡A'a aquiana quia meeiji pea'a'i! —oya poanaje.

¹⁸Bacue oe! ¡Ojjaña quea jjashahuabaqui ja'a, shanei aija ebajjani etehue'yo bacue! Ojaya etehue'yo ojaya bajjani jama ba'a: 666.

**Quea huiso nee ojaya epreeji nei Jesosa nijje
jjaja'a meequei canaje, 144.000 huisome**

14

¹Majoya Eyacuiñajjiya eya eyahuasijje ba mee canaje Jesosa Sioni eyiyo biajje nequi. Eya ba mee canaje ojaya epreeji cuana quea huiso nee nee Jesosa nijje nequi, 144.000 huisome. Onaya ebahuajje etehue'ylo Jesosaja ebajji, Echii aija ebajji pealai ojaya jojoya. ²Majoya eyaya shajja'ajjanaje eyajo ojjaña ma epreeji cuana sohuicuayani, Jesosa bihuia poani. Eyaya oya cuana shajja'ajjanaje ena tii tii poani jayojja, cueji baa siyoo poani jayojja, quea huiso e'iñaqueyajji cuana iñaqueyela cani cuaa jayojja. ³Ojjaña Jesosaja epreeji cuana quea huiso nee nee sohuicuayanaje Eyacuiñajji cojja nei nequi, ebeca pee pealai aquiana eshe cojja nei nequi, Jesosaja epreeji etii 24 huisome cojja nei nequi pealai. Jomajo ojee nequi Jesosaja epreeji quea huiso nee nee cuana sohuicuayanaje, esohuicuayajji eyacua. Ma esohuicuayajji eyacua pea cuanaja eyajo ba'e cuanaja ebajji pojjeama. Ma esohui esohuicuayajji Jesosaja epreeji yahuajo meshijo ba'yahua mimishi cuijea'yo cuana ca ca oe sohuicuayani. ⁴⁻⁵Quea bojea'yo ba'enaje, epana'yo bihuia jjima poanaje onajaya. Siajje po ajja nei nei pealai, mimishi'ama nei nei pealai. Oya cuana Jesosa nijje jjapee neineiquinaje, ma ñajjajja sho'i equecua'yo jayojja nijje. Onijje tii poquiani. Jesosa acui ecueatalapeejo mano'yonaje onaja mimishi cuana sosequia'yojji. Jiquio ecua ebana coojji jjajjani quea pame nee jama jayojja oya cuana quea pame nee. E'e, jiquio ecua ebana coojji ebionei jjajjani quea pame nee poani Jodio cuaa Eyacuiñajji yasijje quia cani ojaya epoji jama jayojjaya oya cuana Eyacuiñajji nijje ba'e tiitije'yo Jesosa nijje pealai jiquio 144.000 Jodio cuana. Jamaya eya, Huani cahuibanaje.

Pea esohuidojijiya huohui canaje Jesosa poe o'oyajjijo

⁶Majoya eyaya banaje pea esohuidojiji eyajo cuabesani. Eyacuiñajjiya oya huoojea canaje ojjaña cuana huasijje Jesosa ojjaña cuana ba'e tiitii mee canijo huohuiya. E'e, ohuaya Jesosajo huohui cani ojjaña cuana ojjaña esohuijo mimiani yasijje. ⁷Ohuaya jama acanaje ba'a: —¡Eyacuiñajji shajja'ajjacue! Oya jama acue ba'a: "Eyacuiñajji, miya quea pame nee nee". ¡Oya bihuiaque! Ohuaya ojjaña eyajo ba'e pana canaje; meshi, bae aii cuana, cuei cuana pealai pana canaje. E'e, jjamaya acue oya; jjeyahua nei ohuaya ojjaña mimishi cuana quea nee nee po mee caje! —esohuidojijiya ojjaña acanaje.

⁸Ma ebionei esohuidojiji huohui cajo, pea esohuidojiji poeyanaje. Huohui canaje jama ba'a: —Ojjaña ma cuiñajji quea quemodo ba'e quea mimishi poanijo quea nee nee po mee caje, Babinonia cuiñajji bajjanijo ba'e cuana. Jiquio ecua oe epona quea mimishiya quea huiso dejja cuana quea mimishi po mee cani jama jayojja dejja cuana jomajo ba'eya pea cuana pea cuiñajji cuanajo ba'e quea mimishi po mee ca'yonaje —jamaya ma esohuidojiji poanaje.

⁹Majoya pea esohuidojiji poeyanaje. Huohui canaje jama ba'a: —Ojjaña joya shanei ai jayojja bihuijji poani shanei nisho'ya pea'ai bihuiajji poani, shanei aija bajjani jayojja ebahuajje, emejje pojja'a jjatehue meequei pea'ai quea nee nee po mee caje'yo Eyacuiñajjiya. ¹⁰E'e, jamaya acajo Eyacuiñajjiya ona nijje quea quene nee nee poaje'yo. Cuaquijo, huichacha quea ihui nee neejo quea nee nee po tiitije'yo. Ojjaña esohuidojiji quea pame neeya ba caje, Jesosaa ma ñajajaja equecua'yo jayojja pea'aiya oya cuana ba caje'yo cuaquijo nequi. ¹¹E'e, oya cuana quea nee nee poaje'yo tii tii; cuaqui huichacha ba'esohuaquije'yo tii tii. Ojjaña joya shanei ai jayojja bihuiajji poani, shanei nisho bihuiajji poani pea'ai, shaneija bajjani jayojja ebahuajje jjatehue meequei pea'ai quea nee nee poaje'yo tii tii, quea nee po pajea'yo ajja tii epojjajo, mecajje pea'ai —jamaya poanaje esohuidojiji.

¹²Jamajjeya ojjaña Jesosaja epeejji cuana dejja mimishiya napa cajo jamatii mete'ama cajjapee tiitiquiahua, ma Jesosa nijje jjapeequi pajea'yo ajja, ojjaña Eyacuiñajjiya esohui jayojja jama acani pea'ai.

¹³Majoya eyaya, Huaniya shajja'ajjanaje pea eyajo mimiani jama ba'a: —Huani, ¡jiquio ecuea esohui tehuecue! Eyacuiñajjiya jjeya nei, quijke pea'ai quea bihui nee nee po mee caje'yo ojjaña Jesosaja esohui huohuijji ma esohui huohuijjiyo dejja mimishiya quecua caje —poanaje.

Majoya Edojjoshahua Pameya jama acanaje ba'a: —E'e jojo nei Jesosaja epeejji cuana ojaya esohui huohuijjiyo mano'yajo ba'e tiitii mee caje'yo Eyacuiñajjiya, jomishoca mee caje'yo; oya cuana sosequia caje'yo esohui huohui canaje sosejje.

Jamaya eya, Huani Jesosaa cahui ba mee canaje.

Eyeacuiñajjiya dejja mimishi cuana napa neinei mee canaje

¹⁴Majoya eyaya, Huaniya eyahuasijje banaje pea jama ba'a: Oe Dejjaja Bacua Ejja jayojjaya bo oshe biajje anioqueani. Ejaahuojja mei huo'o quea nahue esapajo ani ye'oquea canaje, baa ai shehuihui baa quea shejji iña canaje ebianeい mejje. ¹⁵Majoya eyajo pea esohuidojiji Eyacuiñajjiya equijo ani cuayanaje. Cuaya majje taaaanaje joya bo oshe biajje ani yasijje. Jama poanaje ba'a: —Dejja mimishi cuana meshijo ani anoso ai yiye ejahua nee nee jayojja. Jamajjeya janoso ai jahuajo jajasejja ca'yani baa ai shehuihuiya echicha'yoji jayojja jama jjeya nei dejja mimishi cuana acue! ¡Oya cuana chichacue, oe! —jama taaaameya poanaje.

¹⁶Jamajjeya ohuaya bo oshe biajje aniya ojjaña mimishi cuana meshijo ba'eca jaja ca'yonaje; chicha canaje ojjaña. Apoa aca'yonaje.

¹⁷Majoya eyaya, Huaniya banaje pea esohuidojiji eyajo Eyacuiñajjiya equijo ani cuayanaje. Ojaya baa ai shehuihui yani pea'ai. ¹⁸Majoya pea esohuidojiji mei e'ya pejjejo ani, ma cuaqui jijiani pejjejo ani poeyanaje. Oya taaaanaje esohuidojiji baa aijji ani yasijje. Jama poanaje ba'a: —Ojjaña mimishi cuana meshijo ba'e acui jjajja ejahua nee nee jayojja jama. ¡Jamajjeya ejjajja jahuajo

sejja cani jayojja jjeya nei dejja mimishi cuana acue! ¡Quea mimishi poanijo quea nee po meecue! —ma esohuidojojji poanaje.

¹⁹ Jamajjeya meshi yasijje poe majje ma esohuidojojjiya ojjaña mimishi cuana meshijo ba'eca cuana jaja majje chicha canaje quea nee nee epo mee'yojji. E'e, Eyacuiñajji quea quene poaje mimishi cuanajo. Eca ijija pashajji yasijje nequia cani jayojja jama acaje'yo dejja mimishi cuana.

²⁰ Jiquio ecua eca jajasejja majje cuiñajji pejjejo ijjiapasha mee caje eca na cuayaquiani jayojja jama ojjaña quea mimishi poani acaje'yo cuua. Eyacuiñajji ba sa po'yo ajjajo quea huiso nee nee mano'yonaje; jjaquecuaqui'yo majje ena' cuayaquinaje cuei quea quemó jayojja jama, de.

Esohuidojojji cuaa ye canaje me oeje beca mimishi cuana napajji

15 ¹Majoya Eyacuiñajjiya ecuea ebajji jjaja'aqui mee canaje ma quijjeyejje nei ohua acaje. Eyaya banaje pea aquiana ai'ai eyajo nequi. Ba majje quea ajjajja nee nee poanaje. Ma aquiana ai'ai jama ba'a: Me oeje beca esohuidojojji eyaya banaje, Eyacuiñajjiya huoojea cuana ojjaña meshijo ba'eca cuana quea nee nee po meejjii. Ojjaña napajji me oeje beca huisome eyaya banaje. Ona napa majje chama' pea enapajji poaje. E'e, Eyacuiñajjiya ejjashahuabaquijji ojjaña napajji apoa poaje'yo. ²Majoya eyaya banaje bae ai quea siyo tahuoo quea siyo jayojja cuaquijiji quea jeajahua tejjee. Ma bae ai sahuajo nequi ojjaña Jesosaja epeejji cuana. Maaya shanei ai ejja jeabichajea ca'yonaje, shanei ai nisho jeabichajea ca'yonaje pea'ai. Jesosaja epeejji cuaa shanei aija bajjani tehue mee jjima acanaje onajaya ebahuajje. Onijke jjapeequi'yo aija pea'ai. Jamajjeya Eyacuiñajjiya Jesosaja epeejji cuana huasijje quia canaje el'iñaqueyajji cuana esohuicuayajji.

³Jamajoya Jesosaja epeejji cuana sohuicuayanaje Jesosa bihuiajji, Eyacuiñajji bihuiajji pea'ai. E'e, Moisesi, Eyacuiñajjiya esohui huohujji sohuicuaya poa jayojja jamaya sohuicuayame poanaje Jesosaja epeejji cuana, Jesosaa quea pame nee acanajejo. Jesosa bihuiia canaje jama ba'a:

“Eyacuiñajji, miya oe nei quea ca'a nee nee poani tii tii. Ecuana quea bojeja nee po mee'yonaje. Jamaya quea pame nee. E'e, miya quea pame nee nee poani, e'e jojo nei pea'ai. Miya ojjaña huoojeajji po tiitiiani.

⁴ Ecuanaja Emeshi Mese Jesosa, ojjañaaa miquea esohui cashajja'ajja tiiti cahua, camimi cahua jama ba'a: —Jesosa, miya quea ca'a nee nee po tiitiiani —capoahua. E'e, ojjañaaa miya bihuiia caje'yo. E'e Jesosa, miya oe nei quea pame nee nee poani tiitijo Eyacuiñajjiya miya quea boti nee. Eyacuiñajjiya ojjaña miquea eba'ejji quea pame ba mee canajejo, jojjaña meshijo ba'eca cuaa miya cabihuia cahua, mi pejjejo nequiya!”

Jamaya poanaje ojjaña Jesosaja epeejji cuana.

⁵Majoya eyaya eyajo banaje Eyacuiñajjiya equi. Eyacuiñajjiya equi equecuayijji biso nei esecue eca'apejo nequi banaje. Jomajo yani Eyacuiñajjiya

esohui etehue'yo. ⁶Eyaya banaje me oeje beca esohuidojiji Eyacuiñajija equijo nequi cuayanaje. Ojaya emejo yani dejja mimishi napajji, ojjaña meshijo ba'eca cuana napajji. Ojaya daqui quea oshe nee quea jeajahua nee.

Ese'ojje baa daqui ehuosho ba'e mei huo'o quea nahue nee. ⁷Majoya eyaya banaje eyajo ma ebeca pee pealai aquiana eshe cuana Eyacuiñajija pejjejo ani. Oe aquiana esheya caneco cuana quia canaje ma esohuidojiji cuana. Me oeje beca caneco cuana quia canaje. Ma caneco cuanajo yani aquiana dejja mimishi cuana quea nee epo meeji. Eyacuiñajiji enequi tii tii quea quene nee nee poani ojjaña quea mimishi poani nijje. ⁸Jamajjeya Eyacuiñajija equijo aminaje huichacha quea quemó nee nee; Eyacuiñajiji quea ca'a, quea jeajahua, quea jiji nee nee pealai jayojja jomajo nequinaje. Jamajjeya ojjaña cuana Eyacuiñajija equi yasijje dobiqui mee jjima poanaje. Quijje me oeje beca esohuidojijiya me oeje beca aquiana dejja mimishi cuana quea nee epo meeji apoa amajje pea cuana Eyacuiñajija equi yasijje eyajo dobiqui mee caje'yo.

Me oeje beca aquiana cuana dejja mimishi napajji

16 ¹Majoya eyaya Eyacuiñajiji shajja'ajjanaje ojaya equijo mimiani. Ohuaya me oeje beca esohuidojiji cuana huohui canaje jama ba'a: —¡Aquiana miquianajaya canecojo ani shojeacue ojjaña meshijo ba'e yasijje ojjaña quea nee nee po meeji!

E'e, Eyacuiñajija ona nijje quea quene neejo quea nee nee po mee caje'yo. ²Jamajjeya majoya ebionei esohuidojijiya ma aquiana ojaya canecojo ani shojea canaje ojjaña meshijo ba'e yasijje. Jamajjeya ojjaña cuana ma shanei aija bajjani jayojja ebahuajje tehue'yo chiji po mee canaje quea nee nee. Quea nee nee po mee ca'yonaje ohua shanei ai jayojja bihuia canajejo, shanei ai nisho epana'yo bihuia canajejo pea'ai.

Me oeje oe pea esohuidojijiya pea aquiana caneco cuanajo ani shojea jjima so'o. ³Majoya pea esohuidojijiya aquiana ojaya canecojo ani shojea canaje bae ai yasijje. Jamajjeya bae ena quea huo'o nee equecua'yo na' cuayaquiani jayojja po'yonaje, quea ihui po'yonaje ojjaña aquiana enajo nequica mano'yojji.

Me oeje esohuidojijiya aquiana caneco cuanajo ani; shojea jjima so'o. ⁴Majoya pea esohuidojijiya aquiana ojaya canecojo ani shojea canaje cuei quea quemó cuana huasijje, cuei sisi cuana huasijje pea'ai. Jamajjeya ojjaña ena quea huo'o, quea ihui po'yonaje nahuoo cuana mano'yojji.

⁵Majoya esohuidojijiya, ena jaahuanajji poaniya huohui canaje jama ba'a: —Jesosa, miquea ejjashahuabauquijji cuana, miquea esohui cuana ojjaña mimishi cuanajo quea pame nee, e'e jojo nei pea'ai. E'e, miya quea pame nee poani jojoya miya Eyacuiñajija quea jea nee nee. Miya yahuajo nei nei yania poa; jjeya nei miya yani tii tii pea'ai. Jamajjeya ojjaña mimishi cuanajo miquea esohui quea ja'a nee. ⁶E'e Jesosa, ojjaña dejja mimishi cuaa miquea epeejji cuana, miquea esohui huohuijji cuana pea'ai

quecu ca'yajje ena' cuayaquinaje, jjashojeajequinaje. Jamajjeya miyaya mimishi cuana ena', equecua'yo cuanaja ena' cuayaquiani jayojja ishi meeña quea ihui o manojea'yojji. ¡Jamaya capo'yahu! —poanaje.

⁷Majoya eyaya shajja'ajjanaje pea eyajo mei e'iya pejjejo nequi. Oya jama poanaje ba'a: —E'e Eyacuiñajji, miya quea ca'a nee, ojjaña huoojeaña. Miquea ejjashahuabauquijji cuana e'e jojo nei quea pame nee. ¡Pea quea mimishi poanijo napacue! ¡Jamaya capoahua!

⁸Ebeca pee pea'ai esohuidojiji aquiana ojaya canecojo ani shojea jjima so'o. Majoya pea esohuidojiji aquiana ojaya canecojo ani shojea canaje eshequi yasijke. Jamajjeya eshequi quea quiyo nee nee po'yonaje. Quea quiyo nee nee po majjeya ojjaña meshijo ba'e dahua canaje. ⁹Eyacuiñajji ojaya esohuidojiji cuana huoojea canaje dejja mimishi cuana quea nee nee po meeya. Jamajjeya eshequiya dahua cajje Eyacuiñajji niñebea canaje cuaa. Jamatii dejja mimishi cuaa ojaya mimishi pajea'yo ajja quea mimishi nee nee jjejojo. Eyacuiñajji bihuia'yo ajja pea'ai.

Pea beca peejjima esohuidojiji aquiana ojaya caneco cuanajo shojea jjima ani so'o. ¹⁰Jamajjeya majoya pea esohuidojiji aquiana ojaya canecojo ani shojea canaje shanei ai jayojja que, ma ojaya epeejji cuana meshijo ba'e huoojeajji poani que. Jamajjeya quea misi nee nee poanaje. Ojjaña quea nee nee poanaje. Quea nee nee jja'anai jjiaajjejeaquí canaje. ¹¹Quea nee poanijo, chiji poanijo pea'ai ojjaña cuaa Eyacuiñajji eyajo ba'e niñebea canaje. Jamatii ma shanei ai ejja, ojaya epeejji cuana pea aiya mimishi cuana pajea'yo ajja poanaje.

Beca esohuidojiji aquiana ojaya caneco cuanajo ani shojea jjima so'o. ¹²Jamajjeya majoya pea esohuidojiji aquiana ojaya canecojo ani shojea canaje cuei ai yasijke, Eopate cuei yasijke. Esohuidojiji ma cuei huosa mee ca'yonaje. Huosa'yajo emeshi mese cuana meshi eshequi poejji mijijje ba'eca poeje sohuinano quea huiso nee nee cuana nijje jjaquecuaquija.

¹³Majoya eyaya banaje pea beca peejjima eshahua cuana, shona hui jayojja. Oya cuana cuayanaje ma sa'o aija enabajje, shanei ai ejjaja enabajje, esohui huohujji nisho esiajje pojija enabajje pea'ai cuayanaje. ¹⁴Jiquio eshahua cuaa ma dejja ajjima acani quea huiso acanaje. Oya cuana poquije ojjaña meshi yasijke ojjaña emeshi mese chichaa Eyacuiñajji nijje ejjaquecuaquijji. Majoya Jesosa poeje'yo sa'o ai jayojja jeabichajeara.

¹⁵Majoya eyaya shajja'ajjanaje Jesosa mimiani jama ba'a: —¡Shajja'ajjacue mo! Beca cuana ejo ishoa ajja. Jamatii eya poecuajije siipojji poecuajcuajiani jayojja. Joya ejo ishoa'ishoa'ajja ani tii quea bihui nee nee poaje. E'e, eyaya oya cuana quea boejea po meeje'yo. Oya cuana daquijji jayojja jama poaje e poe o'oyajo. Jamajjeya oya cuana bicho'ama poaje e poe o'oyajo.

¹⁶Majoya ma eshahua cuaa ojjaña emeshi mese cuana jjachichaqui mee canaje oe meshi yasijke eyiyo Majeno bajjani yasijke, ma Jodioja esohuijo Amayeno meshi bajjani yasijke.

¹⁷Oe esohuidojiji aquiana ojaya canecojo ani shojea jjima so'o. Majoya ohuaya ma aquiana ojaya canecojo ani shojea canaje beni yasijje. Shojea cajo eyaya shajja'ajjanaje pea eyajo Eyacuiñajji equijo nequi janobajjima nei taaanaje jama ba'a: —Apoa. Eyacuiñajjiya dejja quea mimishi cuana quea nee po mee ca'yonaje.

¹⁸Majoya pojjeje baa siyoo po majamajanaje, taaanaje, cueji po majamajanaje pea'ai. Meshi huehuahuehuanaje janobajjima nei nei pea'ai; yahuajo nei meshi huehuahuehuanaje oe pojji. ¹⁹Jamajjeya Babinonia cuiñajji quea quemojo meshi jjamijisisi jeaquinaje, pea beca peejjima jjamijisisi jeaquime poanaje. Ojjaña pea cuiñajji cuana ojjaña meshijo jaabichajequinaje pea'ai. Eyacuiñajjiya Babinonia cuiñajji quea quemojo jjashahuabaqui majje ojjaña dejja jomajo ba'e quea nee nee po mee ca'yonaje. Ojjaña mimishijo quea quene nee nee poanaje Eyacuiñajji. ²⁰Huehuahuehua majje ojjaña nasi ai cuana chama'yo tii poanaje. Ojjaña eyiyo cuana chama'yo tii poanaje pea'ai. Jamajjeya dejja cuaa eyiyo ba'yo jjima acaje. ²¹Meja na ejjajjacajjaqui cuana quea quemo nee nee, 50 quinome biquieme oquenaje dejja cuana biajje. Jamajjeya dejja mimishi cuaa quea nee nee po majje Eyacuiñajji niñebe neinei canaje.

Epona quea mimishi

17 ¹Majoya oe esohuidojiji e que poeyanaje, ma aquiana canecojo ani shojea canaje. Oya enijke miminaje jama ba'a: —Cua'a! Eyaya miya ba meeje ache nee nee poaje ba'a ojjaña ma cuiñajji quea mimishijo ba'e. Ojjaña cuana epona pea cojjojji jayojja nei nei poani. Oya quea huiso bae biajje anioqueani jayojja jama quea huiso nee nee quea mimishi po mee cani. ²Ohuaya quea huiso emeshi mese cuana quea mimishi po mee cani onijke, beijo sosejje. Ojjaña meshijo ba'e cuana quea mimishi jjashahuabaqui mee cani, ojjaña cuana onijke quea mimishi po tiitii mee cani. E'e, oya cuana ehuoo nei jayojja jama poani. Jiquio ecua dejja huoo majje quea cachasa sei nee jayojja jama oya cuana quea mimishi tii tii po sa poani.

³Majoya ma esohuidojijiya eya dojo canaje meshi quima huasijje. Edojoshahua Pameya eya jjashahuabaqui mee canaje. Jamajjeya eyaya jomajo pea epona banaje. Oya shadaa ai huo'o jayojjaja edaasa biajje aninaje. Ma shadaa ai jayojjaja edaasajo yani bajjani cuana etehue'yo, Eyacuiñajjiya bajjani cuana jayojja. Jamaya Eyacuiñajjiya boti'ama, de. Ma shadaa ai jayojja, shadaa ai ejja pojja'a quea sapa huiso, me oeje beca sapame, 7 sapame. Oya she'anajji pea'ai, quea huiso she'aname ome miji peal'ai, 10 she'aname. ⁴Ma eponaja daqui quea huo'o nee nee. Ojaya eyijiji quea huiso nee nee, mei huo'o cuana, mei oshe quea nahue cuana, ojjaña mei nahue cuana pea'ai. Oja me cuanajo yani oe caneco quea nahue, mei huo'o caneco. Ma mei huo'o canecojo ani aquiana quea tai. Maya ojjaña ojaya ejjashahuabaquijji quea mimishi cuana

jayojja, quea huiso dejja cuana nijje quea tai poanaje pe'a'i jayojja. ⁵Ebahuajje ojaya bajjani etehue'yo poanaje ma ojjaña dejja cuanaja quea quehua. Ese ejjaja esohuijo jama bajjani ba'a: "Babinonia cuiñajji quea quemó ojjaña mimishi cuana ba'ejji" bajjani. Jama tehueme'yaya ojaya ebahuajo jaa. ⁶Majoya eyaya oya banaje quea mimishi nee nee. Ohuaya quea huiso Jesosaja epeejji cuana quecua ca'yonaje Jesosaja esohui huohuijijojo. Jamajjeya ma epona ehuoo jayojja quea bilihui nee poani Jesosaja epeejji quecua ca'yajo. Ma epona quea mimishi ba majje eya quea ajjajja nei poanaje. ⁷Majoya ma esohuidojorijiya eya huohui canaje jama ba'a: —Huani, ¿apiojji acuae miya quea ajjajja nei epona quea mimishijo? ¿Ae jayojja jama ma epona quea mimishi nee, ma shadaa ai jayojja pe'a'i? Eyaya miya huohuije: Jjeya miquea eba pojjeama ma shadaa ai quea sapa huiso, me oeje beca sapame, quea she'ana huiso pe'a'i, ome miji pe'a'i, 10 she'aname. ⁸¡Bacue! Oya shadaa ai jayojja yahuajo nei nei nequia poa meshijo. Jamatii jjeya oya chama' meshijo. Quijje oya quea huesha nee jaa poeje o'oya, jjani aijo ma mimishi cuana mano'yo majje poqui'yanijke jaa poeje o'oya. Majoya Eyacuiñajjiya oya quea nee nee po mee caje'yo. Jamajjeya Jesosaja epeejji pojjeama quea huiso meshijo ba'e, ma Eyacuiñajjiya yahuajo nei nei meshi pana coo jeahuajo onajaya bajjani cuana tehue jjima ojaya etehue'yo eba'e tiitii'yojjijo, maya cuana ma shadaa ai jayojja ba majje quea ajjajja nee nee poaje. E'e, ma shadaa ai jayojja yahuajo nei nei nequia poa; jjeya ca chama' meshijo; jamatii quijje quea huesha nee jaa poeje o'oya Jesosa jeabichajeaa nisho —esohuidojoriji poanaje.

⁹Majoya esohuidojorijiya eya huohui canaje jama ba'a: —¡Quea ja'a nee jjashahuabaquicue shadaa aija sapa quea huiso, epona quea mimishi pe'a'i ebajji! ¡Bacue! Shadaa aija me oeje beca sapa eyiyo cuana jayojja poani. Jiquio eyiyo cuana biajje anioqueani epona quea mimishi. Jiquio eyiyo cuana jayojjaya me oeje beca emeshi mese cuana poani. ¹⁰Me oeje emeshi mese cuana chama'yo tii poanaje. Oe emeshi mese jjeya nei enequi. Pea emeshi mese quijje pishana poeje. Poe majje oya nequije oe pojji cahuime. ¹¹Ma shadaa ai jayojja, shadaa ai ejja yahuajo nei nequia poa meshijo. Jjeya oya chama'. Quijje oya poeje o'oya; emeshi mese quijjeyeje nei nequi poaje me oeje beca emeshi mese cuana apoa poajo. Oya poe jjimahuajo me oeje beca emeshi mese cuana eyiyo cuana jayojja nequinaje. Ona nijje shadaa ai ejja jayojjaya emeshi mese nequinaje pe'a'i. Majoya Eyacuiñajjiya oya chama'yo tii po mee caje'yo. ¹²Huani —Esohuidojorijiya eya acanaje—, miyaya banaje ome miji pe'a'i huiso eshe'ana, shadaa ai ejjaja eshe'ana. Ma eshe'ana cuana ome miji pe'a'i emeshi mese cuana jayojja. Oya cuana quijje emeshi mese cuana poaje. Shadaa ai ejja nijjeya ojjaña cuana huoojea caje'yo oe pojji cahuime cuana. ¹³Ojjaña emeshi mese pea emeshi mese cuana jayojjaya jama jjashahuabaquije Jesosa jeabichajeajji. E'e, ojjaña emeshi mese quea mimishi cuaa shadaa ai ejja shajja'a'jja caje'yo. Deja mase cuana huoojea caje shadaa ai ejja nijjeya Jesosa nijje jjaquecuaquiya.

¹⁴E'e, ojjaña quea mimishi cuana ojee poquije Jesosa quecuua nisho. E'e, Jesosa quecuua sa acaje cuaa. Jamatii Jesosa quea ca'a nee nee. Ojjaña huoojea caje'yo. Ojjaña emeshi mese cuana huoojeajji oe nei Emeshi Mese nei poaje'yo Jesosa. Jamajjeya Jesosaa ojaya epeejji cuana nijjeya ojjaña quea mimishi poani quecuadehuejea caje'yo. E'e, Jesosa nijje ani ojjaña ojaya epeejji cuana. Jesosaa oya cuana babaca'yo majje iyaa canaje ojaya epeejji epoji —esohuidojijiya eya acanaje.

¹⁵Majoya ma esohuidojijiya eya huohui canaje jama ba'a: —Huani, miyaya banaje bae jayojja quea huiso, quea quemo cuana. Ma bae cuana biajje anioquenaje epona pea cojjoji nei nei. Ma bae jayojja cuana dejja quea huiso nee nee jayojja, ojjaña meshijo ba'eca cuana, ojjaña pea esohuijo mimiani cuana pea'ai. Quea huiso nee nee, de —esohuidojiji poanaje—. ¹⁶Huani, miyaya banaje shadaa ai ejja quea she'ana huiso, ome miji pea'ai she'aname, 10 she'aname. Maya ome miji pea'ai, 10 emeshi mese jayojja, de. Maya onajaya ma epona pea cojjoji jayojja boti'ama nei nei poaje. Jamajjeya ma epona jeabichajea caje'yo. Jeabichajea majje jeajea caje'yo epona quea mimishi daquima' jayojja; dahuajea caje'yo. Jiquio ecua ijjiacajjiya aquiana iña majje ijji cani jayojja jama epona mimishi chama'yo tii acaje'yo ma emeshi mese cuaa. ¹⁷E'e, Eyacuiñajjiya ma emeshi mese cuana ojaya esohui jayojja jama amee caje'yo. Jjashahuabaqui mee caje'yo jama ba'a: "Ecuaaya ma shadaa ai ejja huasijke huoojeaje'yo ecuanaja dejja mase cuana quea huiso nee nee oya quea ca'a nee epo meeji". Jamajjeya ojjaña dejja mase cuana huoojea caje'yo cuaa shadaa ai ejja quea ca'a nee nee epoji. Jamaya Eyacuiñajjiya huohui canaje ma ohua quijje nei acaje —esohuidojijiya eya jamaya acanaje—. ¹⁸Huani, miyaya banaje ma epona pea cojjoji jayojja. Ma epona cuiñajji quea quemo nee ojjaña quea mimishi ba'ejji jayojja. Maaya ojjaña pea emeshi mese cuana huoojea cani —jamaya esohuidojijiya eya acanaje.

Eyacuiñajjiya ojjaña Babinonia cuiñajjijo ba'e quea nee nee po mee caje'yo

18 ¹Majoya eyaya, Huaniya banaje pea esohuidojiji. Oya eyajo nequi nequioquenaje dejja cuana huasijke. Eyacuiñajjiya oya quea ca'a po mee canaje. Jamajjeya esohuidojijiya ojjaña huoojea canaje. Quea jeajahua nee nee poaniya jjejojo meshi cuana jeaja'jea canaje. ²Jama taaame poanaje ba'a: —Ojjaña quea mimishi Babinoniaijo ba'e Eyacuiñajjiya quea nee nee po mee caje'yo, chama'yo tii po mee caje'yo. Jamajjeya ma cuiñajjijo ba'equije'yo edosiquiana cuana, eshahua cuana pea'ai, ojjaña cuichojji quea tai ijji ca ajja pea'ai jomajo ba'equije'yo. ³Ojjaña cuana quea mimishi nee nee ma cuiñajjijo ba'e. Jamajjeya ojjaña dejja cuana pea cuiñajji cuanajo ba'e quea mimishi po mee ca'yonaje. E'e, dejja cuana quea mimishi ba'e ehuoo nei jayojja quea jjashahuabaqui tai poani. Jamaya dejja cuana ma

cuiñajji quea quemojo ba'eya pea cuana ehuoo nei jayojja jama po mee cani. Ojjaña pea emeshi mese cuana quea mimishi poani dejja cuana ma cuiñajji quea quemojo ba'e jayojjaya. Ma cuiñajji quea mimishi, quea quemojo yani quea huiso aquiana. Jamajjeya dejja quea aquiana huiso cuana peapea aquiana quea huiso nee jjeshe cani jomajo —jamaya ohuaya eya acanaje.

⁴Majoya eyaya, Huaniya shajja'ajjanaje pea eyajo aniya Jesosaja epeejji cuana iyaa cani jama ba'a: —Ecuea epeejji cuana, ¡a'a aniji ma cuiñajji quea mimishijo! Ona jayojja quea mimishi mi po chana!. ¡A'a jomajo ba'e majajji; miquianaya quea nee nee po chana!, onaya jayojjaya! E'e, Eyacuiñajjiya ojjaña cuana jomajo ba'e quea nee nee po mee caje'yo quea mimishi poanijo. ⁵Eyacuiñajjiya ba canaje onajaya mimishi cuana quea huiso nee nee. Jamajjeya oya jjashahuabaquiani ona napajji quea mimishi nee nee poanijo. ⁶Ojjañaaa jomajo ba'eya miquianaya napa canaje ecuea epeejji poanijo. Jama napa'yomeya Eyacuiñajjiya oya cuana acaje'yo. Onaaya miquianaya quea nee nee po mee canaje enijje jjapeequianijo. Jamajjeya Eyacuiñajjiya oya cuana quea nee nee po tiitii mee caje'yo. Oya cuana miquianaya quea yeno po mee canaje. Jamajoya Eyacuiñajjiya oya cuana quea yeno po tiitii mee caje'yo. ⁷Ojjañaaa ma cuiñajji quea mimishijo ba'eya jjeshe canaje aquiana cuana quea huiso nee nee. E'e, onajaya aquiana quea huiso nee nee. Ma aquiana oja jjeshe huiosojjaya Eyacuiñajjiya oya cuana quea nee nee po mee caje'yo, quea yeno po mee caje'yo pea'ai. E'e, ojjaña jomajo ba'eya huohui canaje jama ba'a: “Ecuanajaya cuiñajji quea pame emeshi meseja epona jayojja jama poani, quea huiso aquiana quea nahue yani. E'ahuemano jayojja jama pojjeama. Quea jaji nee nee. Ojjaña jiquiojo ba'eca quea yeno po aja tii tii” poanaje cuiñajji quea mimishijo ba'eca cuana —jamaya poanaje pea eyajo ani enijje. ⁸—Jamatii quijke Eyacuiñajjiya ojjaña ma cuiñajijo ba'eca quea nee nee po mee caje'yo. Quea yeno po mee caje'yo. Quea shoe po mee caje'yo pea'ai. Ojjaña quiyo jeyojeyo mee caje'yo pea'ai. E'e, Eyacuiñajji quea ca'a nee nee ma dejja quea mimishi cuanajo jjashahuabaquije quea nee nee epo meeji —poanaje pea eyajo ani.

⁹Emeshi mese cuana dejja mimishi cuana ma cuiñajijo ba'e nijje quea mimishi nee nee poanaje. Jamajjeya ma cuiñajji jijianijo huichacha ba majje emeshi mese cuana pajeyo jama ba'a: —Ecuanaja epeejji cuana ma cuiñajijo ba'e quiyo'yoqui. Onajaya aquiana quea huiso ecuanajaya quea boti nee nee. Quiyo'yo majje aquiana quea nahue, quea pame chama'yo tii poaje, de —jamaya emeshi mese quea mimishi pajé quea yeno jjejojo.

¹⁰Cuiñajji quea quemo quiyo'yanijo emeshi mese cuana quea huesha nee nequije'yo quea mete jjejojo. Quea yeno poaje pea'ai. Quea yeno po majje janobajjima nei pajé jama ba'a: —¡Bacue oe! Babinonia cuiñajji etii quea quemo nee nee quiyo'yoqui. Ecuanajaya epeejji cuana jomajo ba'e quea nee nee po'yoqui. Jjeya nei ojjaña jomajo ba'e mano cuajil'yonaje. Chama'yo tii poaje'yo —emeshi mese mimishi pajé'yo.

¹¹Ojjaña dejja quea aquiana huiso ojjaña meshijo ba'e quea yeno poaje Babinonia quiyo'yajo. Oya cuana paje jama ba'a: —Ojjaña Babinoniajo ba'e chama'yo poanaje. Yahuajo ecuanajaya ohuaya aquiana quea huiso nee jjeshe canaje. Jjeya ejjeshe maja'yojjii pojjeama. ¹²E'e, yahuajo aquiana jjeshe canaje jama ba'a: Mei huo'o quea nahue, mei oshe quea nahue, mei sisi quea nahue cuana, mei oshe sisi quea copo pena bajjani cuana jjeshe canaje, daqui quea huiso quea nahue, daqui huo'o quea bame, daqui beje nei quea nahue, daqui huo'ohuo'o quea nahue cuana jjeshe canaje; ojjaña acui equecuashiyo quea shiye cuana quea nahue, ojjaña aquiana bame pealai jjeshe canaje yahuajo; acui ejehui quea nahue cuana, ijjiacajji cuanaja ese' ai'ai, mei jahua edahua, baa edahua cuana, mei ejaja bame cuana pealai yahuajo jjeshe canaje ma cuiñajji etijo ba'eca cuaa. ¹³Bobi quea shiye, quea johua po meeiji cuana jjeshe canaje pealai ma bajjani ba'a: canela, eña quea shiye cuana, madeja jayojja pohui quea shiye cuana, pea shiyeshiye pohui, jjonojjajja na sese, acuijjajja sei, anoso pohui jayojja, bobi anoso jayojja pealai jjeshe canaje. Ana'ai quea huiso cuana, ñajjajja quea huiso cuana, mapichi quea huiso cuana, mapichija aquiana edojoji quea huiso cuana, echacojji sosema' cuana, ojjaña chaco tiitii mee cani pealai jjeshe canaje cuaa ma cuiñajji etijo ba'eyea —jama pa animeya ojjaña dejja cuana poaje Babinonia quiyoqui ba majje.

¹⁴Majoya esohuidojoojji eyajo nequi ojjaña Babinoniajo ba'e nijje miminajje jama ba'a: —Yahuajo miquianaya ojjaña aquiana cuana jomajo ani jjeshe sa poanaje. Jjeya chama!. Ojjaña miquianajaya aquiana chama'yo tii tii poanaje. Eba'ejji quea pame chaco jjima chama' poanaje. Miquianajaya aquiana quea huiso nee eejjeshe o'oyajji pojjeama —esohuidojoojji poanaje.

¹⁵Majoya eya ohuaya huohui canaje jama ba'a: —Huani, Babinonia dejja cuaa aquiana quea huiso nee nee yahuajo jjeshe canaje. Jamajjeya dejja aquiana quiajji cuaa quea huiso nee nee aquiana Babinonia dejja huasijke quia huicha'a huicha'a canaje quea huiso nee nee bejjo sosejje. Jjeya Babinonia dejja cuana quiyo'yonaje, quea nee nee po'yonaje. Jamajjeya aquiana quiajji cuana quea huesha nee nequije quea mete jjejojo. Quea yeno poaje pealai. ¹⁶Pa neineije jama ba'a: “¡Oya bacue oe! ¡Babinonia cuiñajji etii quiyo'yonaje! Ecuanaja epeejji cuana jomajo ba'e quiyo jeyojeyo'yonaje. Ojjaña jomajo ba'e daqui quea nahue, daqui huo'o quea nahue, emeshi meseja daqui huo'ohuo'o jayojja quea nahue pealai huosho canaje. Eyijji mei huo'o quea nahue, mei sisi quea siyo, quea nahue, mei oshe sisi quea copo pena bajjani pealai daquijo ba'ehuana canaje. ¹⁷Jjeya nei ojjaña jomajo ba'e manocuaji'yonaje. Chama'yo tii po'yonaje” dejja quea aquiana huiso pa ani, achacula ojaya aquiana equia'yojji pojjeamajojo. Cuanaya ojjaña bishe ai mese cuana, ojjaña bishe aijo poquiani pealai, ojjaña echacojji bishe aijo chaco cani, ojjaña jai jjequicuayajji poani cuana pealai quea huesha nee nequije. ¹⁸Onaaya huichacha quea quemba caje ma cuiñajji etii quiyo'yanijo. Huichacha ba

majje huohui caje jama ba'a: "Babinonia quea pame nee, de. Pea cuiñajji quea pame pishana. ¡Chama' pea cuiñajji Babinonia jayojja!" pa neineije.

¹⁹ Babinonia quiyo'yani ba majje dejja cuana quea yeno nee poaje. Jamajjeya oya cuana quea yeno jjejojo meshi pohuiya jjasapa natajeaquije. Janobajjima nei pa neineije'yo pea'ai jama ba'a: —¡Oya bacute oe! ¡Babinonia cuiñajji etii quiyo'ya! Ojjaña dejja cuana bishe ai cuanajo chacochacoani quea bejjo huiso poanaje; quea huiso nee nee aquiana cuana jjeshe canaje Babinonia dejja cuaa bejjo sosejje —jamaya ojjaña bishe ai cuanajo nequi pajé.

²⁰ Majoya esohuidojiji miminaje jama ba'a: —Ojjaña eyajo ani, ¡quea bihui nee nee pocue! E'e, Babinonia cuiñajji quea mimishi nee nee quiyo'yonaje. ¡Ojjaña Jesosaja epeejji cuana, o shajja'ajjajji cuana pea'ai, ojjaña Eyacuiñajji esohui huohujji cuana, Jesosaja huoojea'yo esohui huohuiya pea'ai quea bihui nee pocue! Eyacuiñajjiya Babinonia quiyojea mee ca'ya, ojjaña jomajo ba'e pea'ai quiyojea mee ca'yonaje, miquianaya ohua napa canaje sosejje.

²¹ Majoya esohuidojijiya quea ca'a nee neeya mei quea quemo nee nee, shijje cuiapojomeejji mei quea quemo jayojja jeaoqueajea canaje bae ai yasijje. Mei chama'yo tii poanaje. Mei jeaoqueajea majje huohui canaje jama ba'a: —Eyaya mei janobajjima nei jeaoqueajea'yonaje. Jamaya eyaya Babinonia chama'yo tii po meeje'yo; janobajjima nei napaje'yo. E'iya o'oyajji pojjeama tii tii poaje'yo. ²² Yahuajo quea huiso jomajo ba'eya e'iñaqueyajji cuana iñaqueya canaje esohui cuayajji, dehue mia canaje, emiajji eshe'anja jayojja mia canaje pea'ai. Jamaya oya cuana yahuajo poanaje. Quijje ca chojja, jamaya epo o'oyajji pojjeama. Chama'yo tii poaje'yo. Quea huiso jomajo ba'e yahuajo chacochaconaje. Jjeya chama'yo tii echacorjji cuana poaje'yo. Quea huiso anoso ai cuana cuiapasha canaje cuaa yahuajo, meiya. Jjeya anoso ai cuiapashajji chama'yo tii poaje'yo quiyo'yo majje. ²³ Jomajo cuaquijji ejiji o'oyajji pojjeama tii tii, quea misi po tiitijje'yo. Jomajo jjahueaqui ajja tiitii poaje'yo. Chama' poaje'yo yahue esho'i oja huanase esho'i nijje emimijji quea bihui nee. Chama'yo tii tii. Yahuajo ojjaña jomajo ba'e quea aquiana huiso nee nee poanaje; pea cuiñajji cuanajo quea aquiana huiso pishana poanaje. Yahuajo Babinonia dejja cuaa quea huiso pea cuana dasia ca'yonaje. ²⁴ Quea huiso Jesosaja esohui huohujji cuana quecua ca'yonaje cuaa pea'ai esohui huohujji jojoya. Quea huiso pea cuana jomajo ba'e quecua ca'yonaje pea'ai, Babinonia dejja cuaa quea maseya jjejojo, de —ma esohuidojiji quea ca'a nee jamaya poanaje.

Eyajo ojjañaa Eyacuiñajji bihuia canaje

19

¹ Majoya eyaya shajja'ajjanaje quea huiso nee nee eyajo ba'e. Oya cuana janobajjima nei sohuicuayani jama ba'a:

"Eyacuiñajji quea pame nee nee poani. Ohuaya ojaya epeejji cuana ba'e tiitii mee cani eyajo. Oya oe nei ba'e tiitiiani. Oya oe nei quea

ca'a nee nee nequi tiitiiani. ²E'e, ojaya ejjashahuabaqu'i'yojji dejja mimishi cuanajo e'e nei poani. Ma epona pea cojjoji nei nei quea nee nee po mee ca'yonaje. Maaya quea huiso meshi cuanajo ba'e cuana quea mimishi nee po mee canaje. Jamajjeya Eyacuiñajjiya oya quea nee nee po mee ca'yonaje. Cuanaya ma epona tayi Jesosaja epjeeji cuana quea huiso quecua ca'yonajejo Eyacuiñajjiya oya quea nee nee po mee ca'yonaje".

³Majoya ojjaña eyajo ba'e janobajjima nei taaa o'oyanaje jama ba'a: —Eyacuiñajji quea pame nee nee poani. Ohuaya ojjaña quea mimishi ma cuiñajji aijo ba'eca quiyo tiitii mee caje'yo.

⁴Majoya eyajo Jesosaja epjeeji etiyya quea huiso cuaa, ma 24 huisomeya, aquiana eshe cuaa ma ebeka pee pea'ai huisomeya ecui'oshajjajo nequiya Eyacuiñajji bihuia ca'yonaje. Jama taaaame poanaje ba'a: —Eyacuiñajji, miya quea pame nee nee. ¡Ojjaña miya cabihuia cahua! ¡Jamaya capo'yahua! —jamaya onaaya Eyacuiñajji e'anioque ani bihuia canaje.

⁵Majoya pea eyajo Eyacuiñajji pejjejo nequi taaaanaje jama ba'a:

“Ojjaña Eyacuiñajjiya epjeeji cuanaa, ojjaña Eyacuiñajjiya esohui shajja'ajjajji poaniya, ojjaña etiyya, ojjaña esho'i cuaa pea'ai, ¡Eyacuiñajji bihuiacue!”

Jamaya pea eyajo nequi taaaanaje.

⁶Majoya eyaya shajja'ajjanaje pea cuana quea shajjaquijjo. Quea huiso cueji taaaani jayojja, cuei quea quemo, quea cuejipashi nee mei pasaca biajje oqueani jayojja. E'e, ojjaña Eyacuiñajji janobajjima nei bihuia canaje jama ba'a:

“Eyacuiñajji quea pame nee nee. Eyacuiñajji quea ca'a nee nee ani tiitiije'yo. Ohuaya ojjaña huoojea tiitii cani. ⁷¡Eseyo ojo quea bihui nee capo'yahua! ¡Eseyo ojo quea bihui nee camimi'yahua pea'ai! Jama ba'a: Eyacuiñajjiyo ecuana quea bihui nee nee. Oya oe nei quea ca'a nee po tiitiiani. Oya oe nei yani tii tii. Jesosa, ma ñajjajja equecua'yo jayojja quea pame nee. Jjeya oya quea pame nee nequi yahue ejjhuanaquijjiyo jayojja. Ojjaña ojaya epjeeji cuana epona ejjahueaquijjiyo apoa jayojja jama quea boejea nee. E'e, Jesosa poeje o'oya ojaya epjeeji cuana jaahuanaa. ⁸Ojjaña ojaya epjeeji cuana daqui oshe quea pame, quea boejea, quea jeajahua huosho majje enequi. Jiquio ecua eponaja daqui oshe quea boejea ejjahueaquijji jayojja jama Jesosaja epjeeji cuana quea pame quea boejea'yo pea'ai ba'e”.

Jamaya pea cuaa eyajo nequiya Eyacuiñajji bihuia canaje.

⁹Majoya esohuidojiji eyajo nequiya eya huohui canaje jama ba'a: —Huani, esohui tehuecue jama ba'a: “¡Jesosa ejjhuanaquijjiyo ojjaña ojaya epjeeji cuana ojee ca'ljjia'ijjia mee cahua onijje! ¡Ojjaña onijje ojee ijja'ijjia ani quea bihui nee capo'yahua!” E'e, jiquio ecua esohui e'e nei nei poani. Jamaya Eyacuiñajji poani —eya jamaya acanaje esohuidojijiya.

¹⁰Majoya ojaya esohui shajja'ajja majje eya esohuidojiji pejjejo ecui'oshajjajo nequinaje o bihuiajji. Jamatii oya enijje miminaje jama ba'a: —Chojja, Huani. ¡A'a eya bihuiajji! Eya Jesosaja echacojji poani mi jayojjaya, miquea epeejji cuana jayojjaya pea'ai. E'e, miquianaaya Jesosaja esohui jayojja jama aña pea'ai. Edojjoshahua Pameya ojjaña Jesosaja epeejji cuana Jesosaja esohui ba mee cani quea ja'a nee, Huani. Jamajjeya ¡Eyacuiñajji oe nei bihuiacue! —ohuaya eya acanaje.

Huaniya Jesosa ba canaje mapichi osheja edaasa biajje ani

¹¹Majoya eyaya, Huaniya ojjaña eyajo ba neinei'yonaje. E cojja neijo mapichi oshe nequi. Oya mapichija edaasa biajje ani quea pame nee nee. Ojaya esohui e'e nei. Ojaya esohui pea cuanaja eba'ejjijo e'e nei pea'ai. Ohuaya ojjaña quea mimishi poani quecua cani, oya cuana quea nee nee po mee cani quea mimishi poanijo. ¹²E'e, oya mapichija edaasa biajje ani quea cojja jiji nee, cuaquijji jayojja cojjame; ojaya ejahuojja yani pea'ai. Ohuaya quea huiso emeshi mese cuana huoojea cani. Quea huiso cuaa oya shajja'ajja cani. Ojaya bajjani etehue'yo yani. Jamatii pea cuanaja maya ebajjani quea quehua. Ojaya eba ojaye nei ojaya bajjani. ¹³Ojaya daqui ao quea huo'o nee nee, ena' jayojja jama enajo iyanobiajea jayojjaya. Oya ca ca oe Eyacuiñajji esohui bameejji. ¹⁴Quea huiso eyajo ba'e o quishishijji poquije jjaquecuaquiya. Ojjaña quea huiso nee nee cuana mapichi osheja edaasa biajje poquije. Ojjañaja daqui oshe quea pame nee, quea nahue, quea boejea nee, de. ¹⁵Ojaya enabajje yani esohui quea ja'a nee baa quea ca'a, quea shejji nee jayojjaya. Ma esohui huohui majje ojjaña dejja cuana ojjaña meshi cuanajo jeabichajea caje'yo. Quea ca'a nee nee poanijo ohuaya ojjaña dejja ojaya esohui jayojja jama amee caje'yo. Ojjaña shajja'ajja mee caje'yo pea'ai. E'e, Eyacuiñajji ojjaña dejja mimishi ojjaña meshijo ba'e nijje quea quene nee nee poanijo ohuaya, ma mapichi osheja edaasa biajje aniya quea tecue ojjaña huoojea caje'yo. Jiquio ecua acuijjaja quecuapasha cani cuaa jayojja jama Jesosa Quitohua ojjaña dejja cuana acaje'yo; mete mee majje shajja'ajja mee caje'yo. ¹⁶Ojaya daqui aojo, ojaya huachinequi quea quemojo pea'ai yani ebajjani tehue'yo jama ba'a:

“Ojjaña emeshi mese cuana huoojeajji; ojjaña cuana huoojea'yoji poani”.

¹⁷Majoya eyaya, Huaniya pea esohuidojiji banaje eshequijo nequi. Ohuaya janobajjima nei iyaa canaje ojjaña be'o cuabesa ba'e; jama acanaje ba'a: —¡Be'o cuana! ¡Miquianaya poecue! ¡Ojee ijjiá'ijjiahacue! Eyacuiñajjiya dejja mimishi quea huiso quecua mee caje'yo. ¹⁸E'e, ijjeyahua nei emeshi mese cuana ijjiahacue, dejja mase cuanaja mese cuana, dejja ca'a cuana, mapichi cuana, mapichija edaasa biajje ani cuana, dejja mimishi quea huiso, echacojji sosema' cuana, echacojji bejjo sosejje chaco cani cuana, esho'i cuana, etii cuana pea'ai ojjaña ijjiahacue! —ohuaya acanaje be'o cuana.

¹⁹Majoya eyaya banaje ma shanei ai ejja quea huiso emeshi mese nijje, quea huiso dejja mase nijje pea'ai ojee poquiani Jesosa quecuua nisho, ma mapichi osheja edaasa biajje ani quecuua nisho, quea huiso cuana Jesosa nijje nequi quecuua nisho pea'ai. Ojjaña poquinaje Jamayeno meshi yasijje jjaquecuaquija. ²⁰Majoya Jesosaa shanei ejja, esohui huohuijji nisho pea'ai iña canaje. E'e, ohuaya iña canaje esohui huohuijji nisho, ma shanei ejja nijje tiiya quea huiso ma dejja aijima acanaje ojjaña cuana dasia'yoji, shanei ejja bihuia mee'yojji, ma shanei ejja nisho oja a'yo bihuiajji dasia'yoji, ojjaña joya shanei ejjaja dasia'yo majje oja bahua tehue pea'ai iña canaje. Jamajjeya ma shanei ejja, ma esohui huohuijji nisho pea'ai iña'yo majje Jesosaa oya cuana jeajea ca'yonaje bae ai jjiani yasijje, bae quea ihui yasijje. Jomajo tii quea nee nee po tiitijje'yo. ²¹Majoya Jesosaa mapichi oshejo e'anioque aniya ojjaña ejjaquecuaquiji cuana quea mimishi quecua jeyojeyo ca'yonaje baa jayojja, oja esohui'ya. E'e, ojaya enabajo baa jayojja yani, ojaya esohui. Majoya ojjaña dejja mimishi cuana mano'yajo, be'o cuana poeyanaje quea huiso nee nee. Emano'yo cuana ijja neinei ca'yonaje. Quea jejje nee nee poanaje be'o cuana ojjaña equecua'yo cuana ijja'yo majje. Jamaya eya, Huani cahuiba mee canaje.

**Edosiquiana nei jeyo canaje quea shequiaja
huiso nee nee 1.000 shequiajame**

20 ¹Majoya eyaya banaje pea esohuidojiji. Oya eyajo nequi meshi yasijje poeyani. Ohuaya jjani ai ma emano'yo cuana nequi quea doe nee nee nequi cuana cojja yahuejeajji ye cani emejo, aquiana quea ca'a cadena quea quemoyojja pea'ai ye cani. ²Ohuaya iña cañaquinaje, jeabichajea canaje Edosiquiana nei, sa'o ai quea mase nee Satanasa bajjani, ma yahuajo nei nei pea'ai esejaya etiiquiana pana coo ca jehua dasiajjii poa. Iña majje ma esohuidojijiya Edosiquiana jeyo canaje cadena quea quemohua quea shequiaja huiso nee nee, 1.000 shequiajame ejeanobiajeajji. ³Jeyo majje oya jeajea canaje jjani ai yasijje, ma emano cuana nequi yasijje quea doe nee nee yasijje. Capa canaje. Capa majje ca'a canaje. Ca'a majje cojjaahuejea canaje. Enaba capajji'yajo tehue canaje jama ba'a: "Edosiquiana nei ecuayaqui'yojji pojjeama quea shequiaja huiso nee nee, 1.000 shequiajame nequije'yo ojjaña meshijo ba'eca cuana dasia'yo jjima ya'yojji". Jamaya tehue canaje esohuidojijiya. Jamatii quijje nei ma shequiaja huiso nee nee apoa po majjeya Edosiquiana nei ma emano cuana huasijje, jjani ai quea doe nee nee yasijje ejeyo nequi cacuayaqui'yahua beca ba'i cuanajo dejja mimishi cuana dasia o'oyajji.

Ebionei eshequi mee o'oyajji

⁴Majoya quijje pishana eyaya banaje ona huoojeajji cuana e'anioque ani. Eyacuiñajjiya oya cuana huoojea canaje ojaya epeejji cuana huoojeaa Jesosa nijjeya. Eyaya banaje pea'ai quea huiso nee nee Jesosaja esohui

huohuijji cuana ma onaa sapa jajasejjajea ca poa. Mano mee ca'ya poa dejja mimishi cuua Jesosaja esohui huohuijji poanijojo, Eyacuiñajjija esohui cuana huohuijji poanijojo pe'aai. Jesosaja epeejji cuua yahuajo pishana shanei ejja quea mase pishana bihuia jjima, shanei ejja quea mase pishana nisho, meshi epana'yo pe'aai bihuia jjima. Ojaya ebahuajje, emejje pe'aai etehue'yo chama' shanei ejjaja eba'yoji, ma 666 jayojja tehueme'ya chama'. Eyaya oya cuana banaje shequije o'oya. Shequi o'oya mee majje Eyacuiñajjija oya cuana Jesosa Quito nijje ojjaña huoojeajji po mee caje'yo quea huiso nee nee shequiajame. E'e, 1.000 shequiajame Jesosa Quito nijje anije'yo. ⁵Pea eman'o'yo cuana ma quea mimishi mano'yo cuana shequi o'oya jjima; 1.000 shequiajame apoa po jjimahuajo oya cuana shequi o'oya jjima. Joya shequi o'oyani 1.000 shequiajame po jjimahuajo bajjani ebionei eshequi mee'yoji. ⁶Joya ebionei shequi mee caje o'oya quea bihui nee nee, quea pame nee nee poani. Oya cuana nee'ama poaje'yo. Epoqui'yoji pojjeama cuaqui yasijje. Joya ecua pea cuana quea mimishi poani jayojja jama epo'yoji pojjeama Jesosaja epeejji cuana. Chojja, oya cuana Eyacuiñajji nijje emimijji poaje'yo. Oya cuana ojjaña huoojeajji poaje'yo Jesosa Quito nijje pe'aai quea shequiajame huiso nee nee, 1.000 shequiajame.

Edosiquiana nei jeajea caje'yo cuaqui yasijje

⁷Quijje nei ma 1.000 shequiajame po majje Eyacuiñajjija Edosiquiana nei pichojea mee caje'yo. Jamajjeya oya poquije'yo. ⁸E'e, Edosiquiana nei poquije'yo ojjaña meshijo ba'eca dasiaa. Ohuaya ojjaña Co meshijo ba'e, Maco meshijo ba'e pea'ai dasiaqui caje'yo. Ohuaya oya cuana ojee epojji iyaa caje Eyacuiñajji quecuajji nisho. Ojjaña oja dasia'yo cuana Edosiquiana nei nijje nequije'yo. Oya cuana quea huiso nee nee poaje ojjaña meshijaji sope huiosoajja. ⁹Jamajjeya oya cuana quea mase nee nee poaje. Poquije'yo ojjaña meshi cuana huasijje ojjaña jeabichajeeaa. Eyacuiñajjija epeejji queya caje'yo equecuajji. E'e, Jenosanena queya caje'yo Eyacuiñajjija epeejji cuana jomajo nequi quecuajji nisho. Jamatii Eyacuiñajjija eyajo aniya dejja mimishi cuana ba majje cuaqui jeaoqueajea caje ona biajje. Oya cuana Jesosaja epeejji queya'yo epo tii nequi manodehuejeaje'yo, ojjaña. Ojjaña quiyo jeyojeyo caje'yo. Chama'yo tii poaje'yo. ¹⁰Majoya Eyacuiñajjija Edosiquiana nei jeajea caje'yo bae quea jiji nee jayojja huasijje, bae quea ihui, quea pase yasijje. Ma oja dasia'yo cuana pea'ai jeajea caje'yo bae jijiani yasijje, Eyacuiñajjija. Pea shanei ejja nijje, pea Eyacuiñajjija esohui huohuijji nisho quea mimishi pea'ai nijje oya cuana quea nee nee po tiitijke'yo bae jijiani yasijje.

Ojjaña quea mimishi cuaqui yasijje jea caje'yo ecuayaqui'yoji pojjeama

¹¹Majoya eyaya banaje jama ba'a: Epojja oe poajo Eyacuiñajjija ojjaña huoojea caje'yo enapa'yoji. Oya Eyacuiñajji quea jeajahua nee, quea oshe nee

nee bo oshe quea jeajahua nee jayojja. Ojjañaja Emeshi Mese nei oya. Ojjaña meshijo nequi, ojjaña eyajo nequi pealai quea ajjajja nee poani oyo. Jamatii oya cuana quehuajje poqui meemee aija, achacua epoquijji. ¹²Majoya eyaya banaje ojjaña dejja cuana ma yahuajo mano'yo cuana, jjeya nei mano'yo pealai; ojjaña etiiquiana cuana, ojjaña esho'i cuana pealai. Ojjaña nequinaje Eyacuiñajji cojja nei. Eyacuiñajjiya esohui etehue'yo cuana she'a canaje. Pea esohui etehue'yo she'a canaje pealai. Maya o ba'e tiitii mee'yojji oja tehue. Ma esohui etehue'yo ba majje Eyacuiñajjiya huohui canaje ojaya ejjashahuabaqui'yojji ojjaña ba'ya poa cuanajo. E'e, ma esohui etehue'yo ba majje ojjaña huoojea caje'yo. Ojaya epeejji cuana, ojjaña joya quea boejea poani cuana queabihui nee nee po mee caje'yo. Ojjaña joya quea mimishi po nequia poa cuana ca ca quea nee nee po mee caje'yo. ¹³Ojjaña ma yahuajo bae ai'lajo hui'l'yo cuana shequije o'oya. Ojjaña ma yahuajo mojea ca poa cuana, ojjaña emano'yojaa cuana pealai shequije o'oya. Ojjaña joya quea boejea poa cuana queabihui nee po mee caje'yo Eyacuiñajjiya. Ojjaña joya quea mimishi poa cuana ca ca quea nee nee po mee ca'yoquije tii tii. ¹⁴Majoya apoa. Ojjaña mimishi cuana bae ai jayojja jijiani yasijje jeajea caje'yo ecuayaquijji'yojji tii tii pojjeama. Ma bae jijiani bajjani Emano Beca'yojji, quea nee nee nee epo nequi'yojji. ¹⁵E'e, ojjaña joya ebajjani tehue'yo pojjeama Eyacuiñajjiya etehue'yojo o ba'e tiitii mee'yojjiyo aje oe jeajea caje'yo cuaquijiji yasijje, bae ai jayojja queajiji nee nee yasijje, de.

**Eyacuiñajjiya Huani ba mee canaje meshi
cuana, eyatahuatahua pealai eyacua**

21 ¹Majoya Eyacuiñajjiya eya, Huani ba mee canaje eyatahuatahua, meshi cuana pealai eyacua. Eyatahuatahua, meshi cuana pealai yahuajo jama pojjeama. Bae ai'ai cuana chama'yo tii poanaje. ²Eyaya Jesosaja epeejji cuana quea pame nee nee, quea boejea nee banaje. E'e, Jenosanena cuiñajji eyacua jayojja poanaje. Oya cuana eyajo Eyacuiñajji nijje nequi ojee nequioquenaje. ¡Oya cuana ache bame nee nee! Epona ejjahueaquijji jayojja, daqui eyacua quea pame nee huoshocani jayojja, ojaya ejjahuojja quecuaca'aquijji jayojja. ¡Jamaya Eyacuiñajjiya cuiñajji eyacua, ache bame nee nee! ³Eyaya shajja'ajjanaje pea Eyacuiñajji pejejo nequi enijje janobajjima nei mimiani jama ba'a: —Huani, ¡bacue oe! Meshi eyacuajo Eyacuiñajji dejja cuana nijje ba'e tiitiiani. Oya cuana Eyacuiñajjiya jama acaje ba'a: "Jiquio dejja cuana ecuea epeejji cuana poani. Eya ona nijje ani tiitijje'yo". ⁴E'e. Jamajjeya Jesosaja epeejji cuana quea yeno po aija tii tii, mano beca'yo aija, pa aija, shoe'ama, nee'ama poaje'yo tii tii. Yahuajo jama pojjeama poaje'yo —poanaje pea eyajo nequi.

⁵Majoya Eyacuiñajjiya ojjaña huoojeajjiya eya huohui canaje jama ba'a: —Eyaya ojjaña eyacua ameeña. Ecuea esohui e'e jojo nei. Jamaya eyaya aje, Huani. Jamajjeya ¡ecuea esohui tehuecue! —poanaje.

⁶Majoya Eyacuiñajjiya eya jama acanje ba'a: —Eya yahuajo nei nei ani tiitiia poa. Quijje nei eya ani tiitijje'yo pealai. ¡Ojjaña joya quea naba

taja jayojja poani poecue e que! Eyaya e'ishijji ishi meeje sosema!. Enijke jjapeequi sa neinei poanijo quea naba taja jayojja jama poani. Jamajjeya eyaya oya ba'e tiitii meeje'yo. ⁷Ojjaña joya enijke jjapee tiitiquiani Edosiquiana nei jeabichajeajji poani. Jamajjeya eyaya oya cuana ecuea ebacua cuana po meeje'yo. E'e eya, Eyacuiñajji ona nijje ani tiitije'yo. ⁸Pea cuana, chojja. Ojjaña quea mete jjejojo enijke jjapee pajeaqui'yani, eshahuaja epjeejjii cuana, ojjaña quea mimishi ba'e cuana, pea quecuajji cuana, pea cojjojji cuana, eyamiquecua cuana, ojjañaa quea tai acani, eyacuiñajji nisho bihuiajji cuana, ojjaña siajjepojji cuana, edasiajji cuana pea'ai poquije'yo cuaqui yasijje, bae ai jayojja jijiani yasijje poquije'yo. Maya bajjani Emano Beca'yojji quea nee nee epo nequi'yojji —Eyacuiñajjiya eya jamaya acanaje.

Huaniya ba canaje Jenosanena cuiñajji eyacua

⁹Majoya oe esohuidojiji enijke mimiya poeyanaje. Yahuajo pishana oya me oejje oe esohuidojiji cuana nijjeya me oejje beca caneco iñajji poanaje. Maaya dejja cuana me oejje beca napame acanaje. E que poe majje ma esohuidojiji jama poanaje ba'a: —Huani, ¡poecue enijke! Ojjaña Jesosaja epjeejjii cuana epona ejjahueaquijjiyo jayojja eyaya miya ba meeje —ohuaya eya acanaje Jesosajo, ma ñajjajja sho'i equecua'yo jayojjajo.

¹⁰Majoya Edojjoshahua Pameya eya dojo canaje eyiyo ao'ao daasa huasijje. Ohuaya eya ba mee canaje cuiñajji eyacua ojaya quea jea nee Jenosanena eyacua bajjani. Ma cuiñajji eyajo ani Eyacuiñajji anijo anioqueani Jenosanena eyacua. ¹¹Eyacuiñajji ma cuiñajjiyo nequi quea jeaja'a nee nee poani. Jasipe mei bajjani jayojja poani quea jeaja'a nee, tahuuo oshe eshequiya jeaja'a cani jayojja. ¹²Ma cuiñajji peeyi quea ao nee nee, quea quemó nee nee. Yani quea huiso esecue cuana, oe ejiojji beca, 12 secueme. Esohuidojijiya oe ejiojji beca huisome esecue cuana cuiña cani. Esecue cuanajo Isaenija bacua ejja cuanaja bajjani etehue'yo yani, oe ejiojji beca, 12 bajjanime. ¹³Eshequi poeje mijijje pea beca peejjima esecue jaa; eeno poeje mijijje pea beca peejjima esecue cuana jaa; ena poeje mijijje pea beca peejjima esecue cuana jaa; eshequi dobiquije mijijje pea'ai pea beca peejjima esecue cuana jaa. ¹⁴Ma cuiñajji quibo iya 12 meija quibo iya. Ma mei biajje etehue'yo yani, Jesosaja huoojea'yoja, 12 huisome cuanaja bajjani.

Jenosanena eyacua ipia'ajja canaje esohuidojijiya

¹⁵Esohuidojijiya ma enijke miminajeya ma cuiñajji ipia'ajja canaje mei huo'o baacuuya. Esecue cuana ipia'ajja canaje pea'ai. Jiyo ipia'ajja canaje pea'ai. ¹⁶Jamaya poanaje ba'a: Ojjaña cuiñajjiya ejjapeequijji'ya oya quemajja pea'ai. Ipia'ajja majje ba canajeache quemó nee nee poanaje ba'a: Quea quemó nee nee 2.200 kilometro quemome. Oya aohuajja pea'ai, 2.200 kilometro aome. ¹⁷Ejjapeequijji'ya quea moo nee nee,

64 metro moome. Ohuaya ipia'ajja canaje esejaya e'ipia'ajjajji jayojja.

¹⁸Ejjapeequijji'ya jasipe mei quea ca'a, quea jeaja'a. Cuiñajji mei huo'o oopana quea nahue nee nee, quea ja'a, tahuoo quea ja'a jayojja. Quea bame nee nee. ¹⁹Ejjapeequijji'ya quibobo yani quea huiso mei e'iya quea bame nee nee epojji, peapea mei cuana quea nahue nee nee jama ba'a: Jasipe mei cuana, sapino mei quea tahua jiji, asata mei cuana, esemeana mei cuana quea tahua jiji, ²⁰onise cuana quea huo'o siii oshe, caneniani cuana quea huo'o jiji, quesonite cuana quea jahua siyo, benio cuana quea jeajahua, topasio cuana jahuajahua jijijiji, quisopasa cuana iye tahuatahua. Jasine mei cuana pea'ai, ameta mei cuana iye huo'ohuo'o pea'ai. Mahuiso mei cuana ejjapeequijji'ya quibobo e'iya ani. Quea pame nee nee, sho acui iñajo ani eshequiya jeaja'a cajje jahua, huo'o, tahua poani jayojjaya. ²¹Oe ejiojji beca, 12 esecue jjani cuana ejaa. Ma esecue jjani cuana mei copo oshe pena ai bajjani cuana jayojja, quea nahue nee nee. Ejiojji cuana cuiñajji jaa mei huo'o oopana quea nahue, tahuoo oshe quea ja'a jayojjaya.

Huaniya cuiñajji eyacua quea jeajahua nee ba canaje

²²Ma cuiñajji ecuea ba jjima equi Eyacuiñajji bihuiajji jayojja. E'e, Eyacuiñajji quea ca'a nee nee ma cuiñajji jo ba'yani, Jesosa ma ñajjajja equecua'yo jayojja jomajo ba'yani pea'ai. Jamajjeya jamatii oya cuana bihuia cani, ojjañaa. ²³Jomajo Eyacuiñajjiya ojjaña jeaja'a cani. Jesosaa ma ñajjajja equecua'yo jayojjaa ejijijiya jeajiji cani jayojjaya. Jamajjeya quea ja'a nee nee poanijo eshequi, ba'l pea'ai chama' poani. ²⁴Jesosaa ojaya epeejji cuana quea bame nee nee po mee canajejo oya cuana ba'e mee caje'yo quea ja'a nee. Emeshi mese cuana ojjaña meshijo ba'eca cuaa Eyacuiñajji bihuia caje'yo jama ba'a: —Ojjaña aquiana quea pame miquea poani.

²⁵Cuiñajji esecue cuana eca'apejo tii nequije'yo sine'yo ajja jojoya. ²⁶Ojjaña cuana cuiñajji eyacua huasijje dobiquije Eyacuiñajji bihuiaa jama ba'a: —Eyacuiñajji, miya quea pame nee nee.

²⁷Jomajo ca ca ojjaña cuana quea mimishi cuana, quea tai cuana pea'ai, jjadasiaquijji cuana pea'ai edobiquijji pojjeama nei nei. Joya ebajjani tehue'yo cuana ca ca oe dobiqui mee caje'yo, Eyacuiñajjiya. Jesosaa, ma ñajjajja equecua'yo jayojjaa tehue canaje ojjaña ojaya epeejji cuanaja bajjani eba'e tiitii'yojji oja tehue.

Ena oshe eba'e tiitii mee'yojji

22 ¹Majoya pea esohuidojojiya eya cuei quea tahua, quea pame nee eyajo ba mee canaje. Ma cuei Eyacuiñajji e'lanioque ani pejjejo yobi nequi. Jesosa nequi pejjejo cuei shaja cuayaqui pea'ai. Ojjaña joya ma ena ishi cani ba'e tiitii mee cani Jesosaa, Eyacuiñajjiya pea'ai. ²Eyacuiñajjiya cuiñajji eyacuajo ejaa ejiojji quea quemlo. Ma ejiojji tii ma cuei quea pame jaa. Cuei sahuajo, beca mijijje yani acui bajjani Eba'e tiitii'yojji. Ojjaña

ba'ijo jjajja huicha'a huicha'ani. Ma acui iña cuana ijija majje ojjaña jomajo ba'e quea ja'a nee ba'e tiitiije'yo. ³Yahuajo ojjaña quea mimishi poanijo Eyacuiñajjiya quea camaja po mee canaje ojjaña meshi cuanajo ba'eca. Eyajo eba'ejji camaja'ama poaje mimishi cuana chama'yo poanijo. Eyacuiñajji eyajo ma cuiñajji quea pamejo anioqueani. Jesosa, ma ñajjajja equecua'yо jayojja, jomajo yani pea'ai. Jomajo Jesosaja epeejji cuaa oya bihuia tiitii caje'yo. ⁴Jesosaja epeejji cuaa oya ba caje'yo ecojjaa. Ojaya etehue'yo ebahuajje tehue canaje ojjañaja ebajji ojjaña ojaya epeejji cuana. ⁵Cuanaya Eyacuiñajji quea cojja ja'a nee, quea jeajahua nee poanijo ma cuiñajji quea ja'a nee po tiitiije'yo, misi'ama tii tii. Jamajjeya jomajo chama' cuaquijiji. Chama' eshequi pea'ai. Ojjaña ojaya epeejji cuana onijje nequi tiitiije'yo emeshi mese jayojja quea pame nee, ojjaña huoojeajji jayojja.

⁶Majoya ma esohuidojoojji enijje miminaje jama ba'a: —E'e, ecuea esohui e'e jojo nei. Jamajjeya ¡shajja'ajjacue! Emeshi Mese neiya Eyacuiñajjiya yahuajo Edojjoshahua Pame huoojea canaje ojaya esohui huohuijji huohui meesahuaa. Eyacuiñajjiya eya, ojaya esohuidojoojji huoojea canaje mi que, ma ohua quijje pishana acaje'yo ejjanequipana meequi'yojji —jamaya eya acanaje esohuidojoojjiya.

⁷Majoya Jesosa enijje miminaje jama ba'a: —Huani, eya, Jesosa Quito poeje o'oya quijje pishana. Ojjaña jiquio esohui etehue'yo ma eya quijje aje'yo eyaya miya ba meeña e'e nei. Ojjaña joya jiquio esohui e'e jojo nei jama ajji poani quea bihui nee nee capoahua —Jesosa Quitohua eya acanaje.

⁸E'e, eya, Huani ma esohuidojoojji shajja'ajja majje ecuea ebajji ohua jjanequipana meequi cajo pea'ai, eya o pejjejo ecui'oshajjajo nequinaje o bihuaijji. ⁹Jamatii ohuaya eya jama acanaje ba'a: —¡A'a eya bihuaijji! Chojja. Eya Jesosaja echacojji poani mi jayojjaya, miquea epeejji cuana ma Eyacuiñajjiya esohui huohuijji cuana jayojjaya, ojjaña ojaya epeejji cuana jayojjaya jama poani pea'ai, eya. E'e, oya cuana jiquio esohui etehue'yo jayojja jama acani e'e jojo nei. Jamajjeya ¡Eyacuiñajji oe bihuiaque e'e jojo nei! —ohuaya eya acanaje.

¹⁰Majoya ma esohuidojoojji miminaje enijje jama ba'a: —Huani, quijje pishana ojjaña jiquio esohui jayojja jama acaje'yo Eyacuiñajjiya. Jamajjeya tehue majje ejeejo jesohui etehue'yo a'a jjajjajji! ¡A'a esohui cuiabajiji! ¡Ojjaña ba meecue Eyacuiñajjiya ma ohua quijje pishana acaje'yo! ¹¹Ojjaña joya quea mimishi poani Eyacuiñajjiya huohui caje jama ba'a: “Ojjaña quea mimishi poani jamatii quea mimishiya capo tiitiiquiahua. Ojjaña quea tai jjashahuabaquiani jamatii quea taiya cajjashahuabaqui nequiahua tii tii. Jesosaja epeejji cuana ca ca quea ja'a nee canequi tiitiil'yahua. Ojjaña Jesosaja epeejji quea pame nee canequi tiitiil'yahua quea pame nee” poani Eyacuiñajji —jamaya ma esohuidojoojji poanaje.

Jesosaja esohui ecuanajaya eshajja'ajjajji

¹²Majoya Jesosa enijje mimi o'yanaje jama ba'a: —¡Bacue oe! Quijje pishana eya meshi yasijje poeje o'oya. Poe majje eyaya ojjaña sosequiae'yo, onajaya eba'ejji sosejje. Ojjaña quea mimishi poani aje oe quea nee po meeje'yo. Ojjaña quea pame ba'enaje ca ca queabihui nee nee po meeje'yo, eyaya. ¹³Yahuajo nei ojjaña pana jjimahuajo eya yania tii tiia poa. Quijje ojjaña meshijo chama'yо tii poajo eya ani tiitije'yo. ¹⁴Ojjaña ecuea epjeeji cuana quea boejea, daqui quea boejea jayojja quea bihui nee poaje. Oya cuana acuijjajja eba'e tiitii mee'yojji ijija meeje. Eyacuiñajji cuiñajji eyacua huasijje dobiqui meeje'yo esecuejje. ¹⁵Ojjaña joya quea mimishi poani epoquijji pojjeama eyahuasijje Eyacuiñajji ani yasijje. Oya cuana iñahuehua jayojja jama quea tai, quea mase; jjajiojji cuiquijji cuana, pea cojoojji cuana, jjaquecuaquijji cuana pea'ai, eshahuaja epjeeji cuana pea'ai, sijjepoiji cuana pea ai, sijje po majje quea bihui nee poani cuana pea'ai —Jesosa poanaje.

¹⁶—Eyaya, Jesosaa huoojeanaje ecuea esohuidojojji miquiana que ecuea esohui huohuiya. E'e, ohuaya miquiana nijjeya huohui caje ecuea esohui ecuea esohui huohuijji cuana huasijje Asia meshijo ba'eca huasijje. Jodio cuanaja etiiquiana Dabi yahuajo nei Jodio cuanaja emeshi mese poa. Eya ca ca iña Dabija osecua poani. E'e, eya, Jesosa oe nei quea ja'a nee nee nequi, eshequi huiyejji majameta jayojja —Jesosa poanaje.

¹⁷E'e, eya, Huani jama poani ba'a: —Edojjoshahua Pameya ojjaña iyaa cani Jesosa nijje jjapeequi'yojji. Jesosaja epjeeji cuana ojjaña nijje mimiani jama ba'a: “¡Poecue ojjaña, Jesosa nijje jjapeequicue!”

Jamajjeya shajja'ajja majje ojjaña huohuicue jama ba'a: “¡Ojjaña poecue, Jesosa nijje jjapeequicue!”

¡Ojjaña quea naba taja nee nee jayojja poecue Jesosa que! E'e, ba'e tii tii sa poanijo ¡poecue Jesosa que! ¡Ena eba'e tiitii'yojji ishihuacue sosema! Jesosaja esohui cuana ena eba'e tiitijji jayojjaya.

¹⁸Eyaya, Huaniya miquianaya esohui huohuaña jama ba'a: Jiquio Jesosaja esohui shajja'ajja majje jama acue ba'a: ¡Pea esohui e'e nei pojjeama a'a huohuijji! Pea esohui e'e nei pojjeama miya huohuijao Eyacuiñajjiya quea nee nee tii tii po mee caje'yo. E'e, esohuidojojji cuanaja aquiana quea nee nee epo meejiya miquianaya quea nee nee po mee caje'yo. ¹⁹Jiquio Jesosaja esohui jayojja jama huohui sa po ajja shajjama' poanijo Eyacuiñajjiya ma shajjama' cuana cajaa acaje'yo. Jamajoya shajjama' cuana eba'e tiitii mee'yojji pojjeama Jesosa nijje. E'e, ma acuijjajja eba'e tiitii mee'yojji ijija mee jjima acaje'yo. Eyacuiñajji cuiñajji quea pame nee yasijje dobi meequei jjima acaje'yo. Jiquio esohui esohuidojojjiya huohui cajo eyaya tehue'yonaje.

²⁰E'e, Jesosa Quitohua ojjaña jiquio esohui etehue'yo cuana huohui canaje. Ohuaya huohui cani jama ba'a: —¡E'e jojo nei eya quijje pishana poeje o'oya!

²¹E'e, ¡jamaya capoe'yahua! ¡Jesosaa ojjaña Eyacuiñajiji epeejji cuana cajaahuana cahua quea pame nee!

Mahuiso Jesosaa jjanequipana meequi canaje ecuea ebajji ojjaña ohua acaje quijje. Eya, Huani jiquio esohui tehuenaje. Apoa.